

四庫全書

子部

欽定四庫全書

子部

趙氏鐵網珊瑚卷五

詳校官中書臣孫溶

編修臣程嘉謨覆勘

總校官進士臣朱

銓

校對官學正臣周

鉉

謄錄監生臣洪

策

欽定四庫全書

趙氏鐵網珊瑚卷五

明 趙琦美 編

楊椿書虞秦公祺傳

祺字齊年蜀之隆州仁壽縣人遠祖永興公世南仕唐
為弘文館學士由越徙京兆至七世孫殷僖宗中和中
為仁壽郡通守有惠政號仁壽使君卒于官子孫因家
焉歲久家富族滋大率好善積德又七世至祺父軒尤

推行仁義家素倚牢盆為助宋熙寧末廢不舉軒出私錢二百萬以復之歲均所以入給諸親戚及鄉故之貧乏者坐是益困踣而軒夷然自得後生祺甫壯歲知孝敬父母四歲口誦數百言既長學愈力咸以為軒陰德所致軒亦曰吾為善能責報于天殆是子也祺後登徽宗政和四年進士第初主華州蒲城簿改資州文學教授瀘州司刑曹事又加安撫司幹辦公事擢太常博士成都鈐幹成都通守除利州運判丐祠提舉華州雲臺

觀未閱歲起為潼川府路轉運判官尤多善政改漕夔
後復漕潼川以疾卒于官年七十一子允文聰慧夙成
蚤由祺任補官祺年老遂棄官不仕祺卒後允文始擢
紹興二十三年進士第歷官至左丞相祺後以允文貴
贈太師秦國公允文宋史自有傳贊曰易曰積善之家
必有餘慶其弗信矣乎虞氏自仁壽使君而下世世積
善而始發于祺至其子允文資兼文武蔚然為宋代中
興賢相自是子孫彬彬蟬聯簪組雖宋社墟而猶有人

焉不絕慶澤所逮不其久乎傳謂君子之澤五世而斬者殆有時而不然也至正十三年春正月布衣眉山楊椿謹書

楊維禎虞相古劍歌

宋相虞忠肅公八世孫堪謁予雲間草玄閣自云先丞相有古遺器四曰瓦琴石磬蜀王硯與此劍也劍長古赤三握具五寸弱握有二稜起款識可辨者曰千萬歲其鐔橫寸二狀饕餮末甚銳縵文為水銀古

中末間黝漆色芒可吹毛星月下出之艷發乎尹廩
廩然可寒鬼膽是誠千載物也於是酌堪以酒酒酣
為作虞相古劍歌使與古虞公劍同傳為家寶云

昔聞虞公古劍可以追騰空迴落日千年宗社已丘墟
子姓西來傳不失江淮都督憤國讐八陵痛骨三千秋
采石江頭一提出寒芒夜走完顏首堪兮堪兮傳八葉
價金不售山西俠牀頭寶匣不敢開黃蛇上天走雄雷
持謁雲間鍊龍父灑以延津拭以赤堇土虹光一道裂

蛟胎上指黃星落黃雨嗚呼舞鴻門刺魚肚二豎佞何
足數我將假霜鏑伐天矛西山斫白額二東海斬蛟三
頭然後裂蚩尤殪羅睺大開太陽照九州堪兮堪兮勿
失汝劍兮使我徒請上方斬馬之具於朱游至正二十
五年青龍集乙巳王正上日抱遺叟楊維禎在雲間草
玄閣書

雍公孫子氣甚清示我楊顛古劍行劒鋒詩律兩奇絕
秋蓮光彩玉庚庚楊顛健筆老縱橫是亦鍊中之錚錚

吐詞鬱律鳴不平鳳皇來為盛世鳴一代惟數虞翁生
予也學書學劍既老何由而成名倪瓚己酉冬

至正庚寅十月予游錢塘過四壁山中與青城山樵
遇出示予古劍乃其先公雍國所遺也予為樵作古
劍歌以歌之

古劍古劍元非鍊亦非干將與鏐鉞自從混沌鑄成來
出鞘入鞘何生滅輝天燄地不須磨肅氣稜稜凜霜雪
是以曾將破敵酋采石江頭建勲業海晏塵清歌太平

瑤匣藏之在岩穴或時拈出與人看千古萬古欽猛烈
野人鄧羽

吾友虞勝伯隱居南山讀書耕釣不求人識所與游
者皆岩穴之士也其先丞相雍國公忠義立朝具在
史冊所佩古劍以貽子孫代不乏賢而餘風遺烈猶
未泯也至正乙巳歲勝伯自山中來命予賦此劍為
虞相古劍歌與勝伯歌以發其所蘊云匡廬陳惟寅
虞山人何入城訪我衡門下要作古劍行云是雍公所

遺之古劒采石江頭大破完顏兵匣藏累世不敢動忽
然光怪夜夜蛟龍鳴憑軒拔鞘自起舞皎如月下秋霜
明橫磨泰山石直斬東海鯨何不獻書見天子快意一
掃風塵清吁嗟此劒亦神物又于堪也同垂萬古名

雍國丞相虞公古劒一具今藏其孫勝伯家毘陵倪
元鎮匡廬陳維寅既作歌詩詠之且要予同賦焉秦
約

雍公古劒射日星鍊冶鑄出秋霜硎寒光耿耿試一掃

魑魅罔象都逃形匣藏繡澀不敢動龜鱗虎文驚且竦
閱歷星霜三百年社稷闕自茲重雍公磊砢雲夢胸
白虹紫電符采同有時呼酒醉踏月浩歌起舞多英風
采石江頭却鐵騎一戰突營誰可比材官勇將號如雲
每視奇功獨懷媿劒鋒猶漬佞血鮮神物不隨陵谷遷
只愁雷霆破屋壁化作蒼龍飛上天

歐陽玄雍虞公文集序併扎

斯文與造化功用相彌綸國家氣象相表裏故文人生

于世有數文章用于世有時斯言若夸理實然也皇元
混一之初金宋舊儒布列館閣然其文氣高者崛強下
者委靡時見舊習承平日久四方俊彥萃于京師笙鏞
相宣風雅迭唱治世之音日益以盛矣于時雍虞公方
回翔胄監容臺間吾鄙有識之士見其著作法度謹嚴
辭指精覈即以他日斯文之任歸之至治天厯公仕顯
融文亦優裕一時宗廟朝廷之典冊公卿大夫之碑版
咸出公手粹然自成一家之言山林之人逢掖之士得

其贈言如獲拱壁公之臨文隨事酬酢造次天成初無一毫尚人之心亦無拘拘然步趨古人之意機用自熟境趣自生左右逢源各識其職故自其外觀之如深山窮林葱蒨鬱鬱莫測根抵鉅野大澤汪洋澹泊不為波濤試剗其中則日月之精凝結歲久皆成金珠龍虎之氣變化時至即為風雲孰能窮其妙也哉太史夏臺劉君伯溫蚤歲鼓篋從公成均及為江右肅政使者近公寓邑乃裒公之文將傳諸梓書來京師屬玄為序言惟

李漢於昌黎子瞻於廬陵皆能知而能言者是豈為前人役乎弟子公有世契生平敬慕公之文以附著姓名為幸又高劉君政事之暇敦篤夙誼如是遂不敢辭而為之序至正六年二月翰林學士承旨榮祿大夫知制誥兼修國史歐陽玄序

玄頓首再拜伯溫監司相公仁契玄去歲數四附書憲府遽嚴未審一一達几下否春和遠惟履候勝常殊慰詹遡書來知刻虞先生文足見高誼作序當求名筆乃

稱雅意諒切不敢力辭因便輒供藁去刻成千萬見惠
一本為感賤跡遂丐閒之請鄉里距貴治稍近專容修
竿牘之教未中惟順序善葆不具備辱契歐陽玄頓首
再拜二月十一日謹空

虞邵菴小像題贊

昔梓潼虞使君有陰德其歿其子雍公哭之公輒蘇止
雍公哭以為人死而得為佛樂莫大焉乃更哭之耶後
從吏入冥乃知使君死為更生佛今青城公集中有所

謂更生佛祠前瑞竹生是也雍公既相孝廟其府第在
吳下公諸孫有名堪字克用者猶能讀書績學世其家
克用於青城公為再從諸孫從江西畫史得公小像裝
緝之俾人題詠於卷後青城公既以文章師表當世題
詠之者豈易易著語若克用於公為子姓表章其家世
則不得不然

紫芝眉宇鳳麟姿自是文章百世師何必凌烟畫冠劍
雲仍翼翼奉烝祠遂昌鄭元祐

松栢蕭蕭墓上秋衣冠猶識舊風流
雄深典雅文章在酷似唐人柳柳州
淮南潘純

復見玉堂真學士眉山草木必重枯
古心古道文章古試問丹青畫得無
壺中陸行直

頭戴玉冠攜竹杖龐眉丹頰白髯鬚
久知後夢非前夢方信今吾即故吾
已約耆英開洛社更尋歸路問成都
堂堂一代文章伯千載還應再有無
趙郡蘇大年

山居圖為虞克用賦

玉堂仙人虞學士家住青城洞天裏一隨雲霧起從龍
遂掌絲綸佐天子五色製成雲錦裳黼黻皇庭躋虞唐
自騎黃鵠歸帝鄉霓旌羽蓋森翱翔空留舊宅青城下
草木猶餘雨露香諸孫久作東吳客每憶青城歸未得
故人焦粲妙丹青為寫山居懸素壁學士今陪石與丁
往來多在芙蓉城五闕丈人時送迎它年或復游人世
應與諸孫宴幔亭陳基

郭髯予所愛詩畫總名家水際三叉路豪端五色霞米

顛船每泊陶令酒能賒猶憶相過處清吟夜煮茶 天
錫掾郎與余交最久死別忽忽二十餘載念之恨恨如
何可言錫山弓河上玄元道館錫麓玄丘精舍其畫壁
最多今或為軍旅之居或為狐兔之窟頽垣遺址風景
亦異雖予之故鄉乃若異鄉矣不歸吾土亦已十年因
勝伯徵君攜此卷相示為之展玩感慨并敘述其疇昔
相與之所以然者其中有不能自己也捉筆淒然久之
至正二十三年歲在癸卯十二月十日夜笠澤蝸牛廬

中寫倪瓚

倪高士詩帖

仙臺有高士聞在最高峯濯足五湖水結巢千歲松霞
扉雲扃不可到落花如雪絲吹濛醉顏生酤日瞳瞳飛
花蹴踏金芙蓉絳綃為裳玉鍊容往來倏忽其猶龍伊
誰貌此世外蹤青城山人仙中翁運筆直與天同功倪
生作詩以詠歎凌跨倒景他日期相從倪瓚

留別勝伯先生

清才卓行虞徵士食粥三年致母喪詩法道園能繼武
畫傳洪谷早升堂獨高落落松筠節不逐悠悠雁鷺行
此日別君江海去波光鷗影思微茫倪瓚

江渚暮潮初落楓林霜葉渾稀倚杖柴門聞寂懷人山
色依微至正癸卯秋九月望日戲為勝伯徵君寫此并
賦小詩倪瓚海雲菴燈下記

元人諸帖

文原頓首再拜總管相公本齋先生閣下文原不意慶

門為福所倚堂上忽以微疾奄至大故聞訃驚惶曷能
為情然壽母以貞節終始有子克盡孝道為時良二千
石亦可無憾九泉矣銘文見委義不得辭屬體中略苦
風寒而來使以河水不能久留未免力疾屬稿且繕寫
納去其于發潛德則未之有取也遺貺益重愧慙地遠
不能引却悚然而已人還率爾具復冬令嚴寒惟順理
節哀是禱總干照察文原頓首再拜 來諭一一為嗣
言之自有書奉荅銘文中為字有失筆別篆紙末壽康

菴記來使趣行當俟驛使便納上來使勞中統一
本頓首再拜尚書相公本齋先生文侍舊牘率易晉拜
旌麾之下辱賜與潔殊慰積年仰慕之心宴賸稠疊禮
意隆重何以克堪惟深愧感而已別來伏想福祥至止
百神衛大萬士民之望旋膺鈞樞之任至慰至慰本擬
以正初抵杭方聞江上有阻遂自泰興江陰展轉留滯
二月初方達吳門得會季野舍人同到金井山中瞻視
岡巒形局寬大氣勢雄偉與聞相合謂為福壽之基亦

頗如諸名公所論而鄙淺之見尚有可疑者蓋入首山
脉直下稍長則乘氣勁急倘稍加轉換庶合古人增高
益下趨吉避凶之說必欲如閩中龜蛇之地山盡水聚
生意藏蓄則未能悉其造化之妙亦非面對不能詳盡
惟高明裁察茲因人便謹奉起居以致謝私併投獻其
一得之愚蕪率伏祈恕亮餘惟為國家衛愛式副對揚
不備二月十八日客吳中杜本頓首再拜上呈

集頓首再拜上狀總管大尹相公閣下即辰歲事告成

天地方泰整弭皇華之節尚系白雲之思神明夾扶履
用清吉集今夏復過姑蘇不能少候騎氣之還已覺悵
惘及承珍灑乃知追及惠泉益重不敏之罪然而千里
明月通夕台星何異瞻對顏色也亭中清話秋仲間翁
自上京還方面及之節次當已達聽茲不復贅觀僧辱
位置造就倍費神用不勝感激集與弟兄皆宦游四方
先隴寄彼動輒曠引時歲無由一至托此於一二隣近
而已而食不足贍給今得此稍慰其望則集可以少抒

其情然則閣下錫類之仁何可忘也引墨陳謝未究下
忱之萬一惟冀保嗇方今龍飛御天求賢共理有若閣
下治最久當簡在行膺大用匪朝伊夕集雖不武尚能
泚筆來賀謹奉狀不備集再拜狀上

至正丙戌暮春亞相王公本齋之子季境補淮
東宣閫奏差以公事乘傳至京師訪予玉堂之
署臨別求贈言為賦唐律一首

南來驛騎錦障泥春雨都門雁影低淮漕慣迎鄰使節

浚郊曾築相君隄道逢棠茇思親慙家視槐陰與屋齊
江左夷吾吾舊友羨君年少躡雲梯廬陵歐陽玄

胄出名門正妙年置身聊爾奉藩宣塵生驛路頻驅馬
雨溢官河穩放船后土祠中花綴玉平山堂下柳飛綿
遙歸公館應多暇好對芸牕理舊編晉陽馮思溫

春滿維揚十萬家先公曾此駐高牙官廳寂寂留芳樹
舊館陰陰閉落花祠下繫鞍尋芍藥樓前騎鶴聽琵琶
歸來不異當時事一路東風帽影斜齊張起巖

李境舍人歸維揚朝中名公各贈以詩看雲八
十翁閑閑吳全節作唐律一首以授之

相君五馬牧饒時玉樹秋香生桂枝日麗鳳毛延世澤
風培鵬翼運天池平山堂北看紅藥析木津頭識紫芝
文獻通家遺逸老塗鴉贈別寫烏絲至正六年丙戌三
月廿又三日

公子翩翩英妙時
顰煩訝使到京師
長河春漲魚龍水
別驛風生鳥隼旗
家自烏衣通世譜
人從鳳閣識朝儀

舊游賓客頭如雪
屬目雲霄未厭遲

遠憶淮南后土祠
君歸春已發
瑤枝好尋月下吹簫處
猶及花前把酒卮
錦瑟金錢餘舊伴
烏絲紅袖有新詩
故人相見如相問
老盡當年杜牧之
季境歸會克明元
璋二老友出似一笑張翥

予識本齋三十年
文章宦業世所稱
道今年其子季境
于維揚有善繼述
忠孝之家其可尚
哉趙期頤書

史局先生示以季境京師贈行卷輒題一絕卷

錦

校書苦借青藜杖下馬笑拈金屈卮好是淮南師弟子
錢唐相見落花時方外張雨書以丁亥二月

僕自歸田後當時故人俱在天府而集以目肯又不能
起居遂成路遠近紫巖自維揚來出示此卷遂知大參
本齋公之子季境自京還一時臺閣羣公贈行之詩也
令人誦之神清氣爽飄然欲仙掩卷慨想復徵予題蓋
季境已曾作字說寄之矣今重為書于是卷聊寓觀感

云伯生

玄頓首再拜李野府判相公仁友玄於左右雖疎而英
譽稔甚矧于先清獻公實有一日之雅向歆克肖契誼
不殊相望千里之遙情親對晤有以也夫近者闕季道
盛雅以清獻神道碑見屬既而傳旨下諭不敢以病憊
控辭已繕寫付季德今聞託張德常轉達第愧兵後罹
憂百感交集何能發潛光之萬一太湖多善碑材刻成
以拓本見寄為幸德常附海艍行勿勿函奉起居草略

併于台照客京歐陽玄頓首再拜 季耕照磨同致再
三意玄又白

翦頓首上記季京郎中相公契友閣下奉違晤言已閱
數歲比聞使馭上三山尋又聞在武林而一皆平安之
報良用自慰區區備員翰讀近又承乏冑監昏嬾日侵
告歸未允其貧而無子猶故吾也僕滿意季德之迴豈
意有此凶憂為之痛心況手足至親其終天之恨當何
如也尚在以人生有數少自寬解為禱季野令兄相公

如會萬萬叱名不及顓狀燕吳相望海航往來動以年
期惟珍護自強前即遠大不宣中秋日老蛻張翥頓首
上記

近覽鏡白鬚漸多戲作滿江紅長短句繡江先
生拜參上馬敢錄呈醜幸乞一笑鮮于樞頓首
詩酒名場人都羨紫髯如戟今已矣星星滿領不堪重
摘衰老自知來有漸窮愁誰道尋無迹笑劉郎辛苦覓
仙方終何益東逝水西飛日年易失時難得賴此身

健在寸陰須惜生死百年朝有暮盛衰一理今猶昔問
人間誰是魯陽戈杯中物

奉寄都運大參相公聊致久別企仰之萬一采
覽幸甚虞集頓首

計相淮南重憺帷海上還頻煩紆智略周慮及疲孱調
鼎公宜早歸耕自得閒常攜相贈策扶老向江山

集至逍遙山見饒紫巖間將適瓊華之囿當以
舊關瞻承風采因得附此起居紫巖玄門耆宿

之士退食之暇必能少從清靜無為之論遙為
傾企集又拜二月五日

我尋天上張公子新買江南宅一區桂樹小山金作粟
芙蓉秋水錦成株青龍繞屋瀦三垞翠鳳當門啣一珠
世事紛紛何日了好將真樂問堯夫

至正丙午秋七月四日放舟龍江入艾浦訪文
湘翼之張侯飲于真樂齋席上賦詩一律率坐
客子山德昂兩進士用韻成什會稽抱遺叟楊

維禎明日在任老人讀易齋試新製鍊心頴書

四韻詩奉荅大章貢士見寄

臘日放船歸泖上滄灣遲子渺愁予河東有賦煩傳送
此月無冰又可書老鐵一經能取紫庾郎三韭豈忘魚
明歲門生求坐主相看喜色動皇居臘月八日客塲上
余日強再拜

又一詩奉上鐵厓先生先錄去一過覽後當別
寫上也

揚子十年官不調才高白首尚為郎因觀禹跡多留越
為愛西湖又入杭仕宦豈無三語掾風流誰似四明狂
水南山北題詩遍猶憶吳中錦繡坊

豫章熊公自得攜所著書入都城西山齋堂村
山深民淳地僻俗美隱者之所宜居崇真張宜
相真人偕往作詩送自得兼柬宜相平心老人
歐陽玄

先生去隱齋堂村境趣佳處如桃源西出都門二百里

山之盤屋水浩疊一重一掩一聚落一溪十渡深而渾
羊腸險徑挂山腹蜂房小屋粘雲根立當阨塞若闢隘
視入衍沃同川邈市朝甚邇俗塵遠土產雖少人烟繁
鉏耰藝陸宜菽麥樹柵作園能雞豚園蔬地美夏不燥
煤炭價賤冬常溫前年熊郎入賣藥施貧者藥人感恩
熊君攜笈今就子繞舍木葉書續繙崇真人又繼往
況是偃佺之子孫紫簫夜吹遼鶴至林響谷應松風喧
登高東望直沽口海日湧出黃金盆應憐曩情戀象闕

坐羨龐公歸鹿門

次韻圭齋先生寄贈松雲隱君老蛻翦上

燕垂趙際中有村正在西湖之上源源頭花落每流出
亦有浴鳧時在壘隱君葺茅據幽勝髣髴小莊如陸渾
環之蒼松數十樹拔出太古虛無根攢峯疊壁何盤盤
地多磽礧少平原先生生計雖苦薄最喜靜無人事繁
黃精本肥朮苗麤疆場有瓜牢有豚吟詩作畫百不理
一家笑語常春溫功名祇遣世途累飽煖已荷皇天恩

近聞京志將脫藁貫穿百氏手自繙朱黃堆案墨滿硯
鈔寫況有能書孫雲晴輒尋羽客去穀熟方來山鳥喧
土牀暖炕石窯炭黍酒香注田家盆要知精舍白鹿洞
不待公車金馬門

趙魏公二帖

孟頫上復 丈人節幹丈母縣君孟頫一節不得來書
每與二姐在此懸思而已伏想各各安佳孟頫寓此無
事不煩憂念但除授未定卒難動身恐二老無人侍奉

秋間先發二姐與阿彪歸去幾時若得外任便去取也
今因便專此上覆聞鄉里水滂想盤纏生受未有一物
相寄二姐歸日自得整理一書與鄭月窗望遞達不宣
六月廿六日孟頫上覆

手書上覆丈人節幹丈母縣君孟頫謹封

孟頫頓首希魏判簿鄉兄足下孟頫奉別誨言倏爾兩
歲追惟從游之樂丹青之贈南望懷感未知所報惟是
官曹雖閒而應酬少暇以故欲作數字道區區之情而

不可得希魏愛我甚至當不以為譴也即日毒熱伏想
水精宮中夷猶自得履候安勝孟頫賴庇如昨秋間欲
發拙婦與小兒南歸以慰二老之思是時又當致書併
以繆畫為獻也家間凡百悉望照拂因便奉狀不宣六
月廿六日孟頫再拜

今人觀趙承旨書但見其晚筆縱逸為勝殊不知妙年
應規入矩有如此帖者不由規矩而縱逸是猶疾行無
善步也識者試與評之至治二年九月廿五日後學錢

良右敬題

松雪老人書法在中年時一筆不苟怡怡然得天趣此
唯識者能知之泰定元年八月廿日隴西李皓見于氏
文房

李西臺書名重一時而東坡乃謂雖可愛終可鄙雖可
鄙終不可棄吾嘗妄意借為子昂方寸大字之目聞者
瞿然固難為淺見寡聞者道也至其尺牘揮灑奕奕有
晉人一種風氣亦不可掩且未易及哉未能上下古今

書畫之變而窺其妙遂欲出意品題恐不免紛紜兒輩之侮也泰定甲子季秋蜀梁子寅書

吳興公字畫之妙不待贊詠而知也是帖蓋在兵部時所與江南故人者王謝沓柁風氣不可復作撫卷為之太息吳郡陸友仁記

自晉唐以來法帖其事率皆飛問通叙施於家人朋友之間不過數行而已其初非用意而逸筆餘興淋漓揮灑百態橫生使人驟見驚絕徐而視之其意度愈無窮

故後世傳之往往以為奇玩而想見其人今觀松雪仙人與月窗判簿手帖宛有古意濃纖剛柔皆與人意會真希世之珍又非獨傳玩而已也淳卿其善保之泰定某年九月九日隴西李叔書于靜寄東軒

鐵鎖銀鈎到者稀鷗波亭上墨如飛後人何處求書法華表千年待鶴歸南陽張遜

餘不溪邊采白蘋鐵網珊瑚寸寸珍天上玉樓盛不住虹光夜夜貫星辰遂昌鄭元祐

書中若說候除官客舍幽州六月寒近接阿彪歸後語
婦翁強健縣君安吳僧嗣益

吳興松雪公名高當代而書法之妙蓋牢籠古今出入
義獻也此二帖雖盛年所書然其輕清流麗之畫得超
邁入神之變有非後人所可及者淳卿寶之無數泰定
五年三月一日梁溪王禮實觀

松雪先生翰墨之妙名冠一代其下筆之勢出規入矩
灑落超逸非鍾王不足與議也至其晚年筆力猶為妙

絕金石所刻後學之士多所師法今觀此二帖前人風流餘韻典刑具存不覺起敬吳門丘宗

杜少陵云斯人已云亡草聖固難得及茲煩見示滿目動悽惻斯言盡之載閱此卷令人悼痛不能已已後學張淵

書法自唐顏柳以來多尚筋骨而乏于風韻然務筋骨者則失於狂趣喜風韻者則過於軟媚求其兼善而適中者亦難矣至宋李建中蔡君謨輩追蹤六朝見稱於

時論者猶謂未能盡善本朝趙魏公識趣高遠跨越古人根抵鍾王而出入晉唐不為近代習尚所窘束海內書法為之一變後進咸宗師之或緘之篋笥或傳之金石不能悉數也此二帖規摹義獻其第一帖絕與聖教序相類非有墨池筆塚之功者豈易及此披玩歎伏因識其後至正二十五年秋七月既望盧熊書

趙松雪諸帖

僕在西州日為劉簡州作埋文今其子賁軸來欲干先

生一言以發幽堂之光幸賜數語為荷為荷鄙文不足道也伏乞點竄李源道再拜松雪學士先生

跋李仲淵所為劉簡州墓銘後

余讀仲淵之文知劉簡州之為人有用世之才因劉簡州之行事見仲淵叙事有稽古之學蓋古之為文者實而不譎簡而不與理而不詡若仲淵之文真古文也哉若劉簡州者真可於古人中求之也哉趙孟頫

奉題晉齋小稿

少年文藻發天葩錦繡機成自一家春日故應繁草木
空山元自足烟霞詞源浩蕩無終極理窟淵深豈有涯
知子苦心參道妙可能從我鍊丹砂吳興趙孟頫

乘月過西郊渡

遠山含紫氣春野靄雲暮值此歸時月留連西澗渡謬
當文墨會得與羣英遇賞逐亂流翻心將清景悟行車
儼未轉芳草空盈步已舉候亭火猶愛村原樹還當守
故扃恨恨乖幽素子昂

南谷先生杜尊師余自兒時識之居昇元觀未十年昇
元蓋文子舊隱其地常有光恠亦仙靈所栖勝處也師
屬余作老子及十子像併采諸家之言為列傳十一傳
見之所以明老子之道將藏諸名山以貽後人余謂茲
事不可以辭乃神交千古彷彿此卷用成斯美師名道
堅南谷其自號云至元二十三年元日吳興趙孟頫
胡汲仲天資高爽發言便自超詣此賦為南谷所作文
與事稱其自邇至遠則似晉問其琢詞造語則似鵬賦

其高舉寥廓則似遠游過此以往吾不知所擬矣尊師
既仙去重為季安師聖書一通刻石山中吳興趙孟頫
詩止唐人公論一定以不易集存丁部私藏幾何而能
傳欲免徧觀盡閱之勞可無精選重編之舉因奮吾志
遂成此書自武德以迄乾符歷三百載始古風而終絕
句餘二千篇繕寫實難流布未廣將俾衆工以鋟木必
藉諸賢之揮金借力倚陶相與作新于文印齊名李杜
共看興起于騷壇鄭君子封出所編唐詩六十卷選擇

之精甚便後之學者惜其無力板行因為書此子昂

右宋人十一家書皆表表著見者嘗試評之李西臺書
去唐未遠猶有唐人餘風歐陽公書居然見文章之氣
蔡端明書如周南后妃容德兼備蘇子美書如古之任
俠氣直無前東坡書如老熊晝游百獸畏伏黃門書視
伯氏不無小媿耶秦少游書如水邊游女顧影自媚薛
道祖書如王謝家子弟有風流之習黃長睿書如山澤
之癯骨體清澈李博士書如五陵貴游非不秀整政自

不免於俗黃太史書如高人勝士望之令人敬歎米老
書如游龍躍淵駿馬得御矯然拔秀誠不可攀也丙戌
十一月廿一日大梁趙孟頫

薛道祖薛昂之子黃長睿黃履道之子二父皆邪人
而其子乃以善書知名士亦不可不游于藝哉子昂
此評乃是效米老也紫陽山人方回題

作畫貴有古意若無古意雖工無益今人但知用筆纖
細傳色穠艷便以為能手殊不知古意既虧百病橫生

豈可觀也吾所作畫似乎簡率然識者知其近古故以
為佳此可為知者道不為不知者說也子昂跋

舜舉作著色花妙處政在生意浮動耳邇來日夕沉埋
醉鄉吾恐久乃不復可得覺非其深藏之同郡趙孟頫
題

僕與伯機同學書伯機過僕遠甚僕極力追之而不能
及伯機已矣世乃稱僕能書所謂無佛處稱尊耳必明
持鰲羣帖見示使人歎賞不能去手而又甚慶其有子

也至大三年八月廿三日將赴杭州車橋寓舍題子昂
余臨王獻之洛神賦凡數百本間有得意處亦自寶之
顧善夫余之愛友其家所藏者皆得意筆也揚州何進
士每以高價求余書可謂好事者遂書此賦一通贈之
至治二年秋孟子昂記

鮮于伯機遺墨

游高亭山廣嚴院記

元貞元年四月廿日送客臨平鎮晨起買舟堰下出東

新橋自高亭山以北岸多野酴醾香氣酷烈薰人欲醉
晚宿廣嚴院僧普聞好奇喜客置酒西有樓下夜分乃
罷明日遍歷殿廡得唐玄覽法師碑於東廡之下乃開
元廿三年集賢學士徐安貞撰諫議大夫褚庭誨書云
師姓褚氏其先河南人食采錢唐因家焉師生而慧解
從慧昶出家本邑有故隋華嚴寺乃師俗緣之地因成
此院後改今名碑經焚燬全不可讀寺有錄本遂得其
詳僧又指護伽藍神曰此玄覽法師之祖褚河南也是

日行者過期未出晉聞者煮筍薦酒復飲故處大出書
畫誇客中有淨師草書四大幀圓熟有師法殊可喜問
之乃寺僧也紹興初嘗被召作草首書名花傾國兩相
歡宋主不悅賜罷今錢唐人家所收稱王逸老合作者
皆其書也又東坡趙令鑠唱和真蹟一卷坡詩集中有
之令鑠有詩聲集不行世因全錄之序云予瞻和予致
齋詩有端向甕間尋吏部老來惟欲醉為鄉之句因送
薄酒兼成斐章冀發笑也古人醉以酒蓋亦有所寓一

飲百憂忘陶陶朝復暮公欲醉為鄉甕間尋吏部惜取
青銅錢濁醪安足酤敢竊好事名聊資子雲具巧手斧
鼻端此情知有素東坡和云伯堅惠玉膏兩壺且枉佳
篇次韻戲荅神仙無石髓生世悲轉寓坐持玉膏流千
載真旦莫青州老從事高上非所部惠然肯見從知我
困市酤開瓶自洗盞肴核誰與具門前聽剥啄烹魚得
尺素伯堅又詩云子瞻辭免起居之命令鑠復用前詩
之韻一首以勉之登州與儀曹到官如旅寓螭陞鳳凰

池翔翔未云莫冰雪照人清黃色盈中部譬如千日釀
一宿陋清酤載筆無多時公真濟時具歎息賀德基猶
知我尸素自此次韻題其後者一人劉握以詩跋者四
人湯思退孫仲和葛立芳陳之茂以子孫題者四人蘇
籍蘇嶠趙伯醇劉岑觀覽署名者十人陳相汪應辰鄭
作肅范彥輝芮燧徐度凌景夏尹禧劉攽姚述堯最後
王明清題云英宗潛龍日居穆親宅與宗屬溜恭憲王
游從最厚慶厯八年歲在戊子兩家各生子同年月日

時其後英宗入繼大統所誕即神宗既即天位以是日
為同天節恭憲所育迺太僕伯堅也為本朝登進士第
之冠易文階最先子孫蕃衍世科相望聲華焜耀以至
于今五行之說其可不信哉僧云伯堅子孫今居臨平
貧不能自振此卷近年以粟易之其他無可錄者是晚
始與行者別明日將還普聞曰此去佛日十里而近有
寺曰淨慧山水最佳寺有東坡題名真跡不可不一到
于是自下山乘馬沿田塍轉村塢詰曲行香篆中如是

者數里過黃鶴山地始平路漸廣峰巒秀拔林麓深邃
夾道清泉如奏琴筑是時小雨霽止雲日鮮潤四顧間
然惟聞一鳥啼長松間同行者人人自失謂真在武陵
桃花源也少東遙見飛閣出木末導者云已到山門矣
乃揖蒼髯叟酌甘露泉而後入時已破午羣僧皆醉住
持覺老人城遂徑造方丈得東坡真跡于法堂東壁云
祖老入山之十三日述古赴南都率景達原叔子中子
瞻會別于此熙寧七年八月十二日字方四寸許又有

贈榮公五絕句石刻詩見集中循東廡下入庫堂觀渥
洼池池泉玉色出東北山之麓有石坡陀半在水中因
公有不堪土內埋山骨未放蒼龍浴渥洼之句遂名回
抵西廡入藏殿觀元豐間所書經藏有巨蛇不敢近者
久矣將出得兩石於山門之左乃揚無為司馬才仲秦
少游之詩云元祐元年六月十五日還自海上入佛日
山淨慧道場瞻禮懷禪師時長老弼公即阿育王大覺
禪師之嗣也送余出山酌甘泉而別因留詩曰佛日山

前水行人甘露杯須如源派遠直自四明來才仲云石
冷苔生暈風高竹度涼道人何處去春色半滄浪少游
云五里喬松徑千年古道塲泉聲與嵐影收拾入僧房
楊則手書才仲少游皆范石湖追寫初約元仁同行及
期元仁以事不果故僭述所見以告拙詩數首附後仍
乞呈似巖翁山村井西存博善之仲實無逸諸同志寵
和

留題廣嚴寺

送客臨平古佛祠聞公房裏住多時
驪歌不見金閨彥
濁酒聊參玉版師
龍像彫零餘故塔
蛟鼉斷缺有殘碑
藕花未發風蒲短
空詠參寥七字詩

高亭道中一絕留題淨慧壁

野醪釀發氣薰然
睡起時驚雪入船
安得鴟夷三百乘
空令饒客口流涎

淨慧寺四絕

寂寂僧房半夢中
蕭蕭修竹四山風
惟應門外蒼髯叟

解亂儋州禿髻翁

晚雨纔收日已西
石梁沙路淨無泥
清泉瀲灩千峯迴
綠柳陰陰一鳥啼

壞壁蒼蒼上綠苔
籠紗無復護塵埃
只應枉駕游山客
總為坡仙寶墨來

學道能知髓與皮
聖門壺奧要探窺
十年來往臨平道
爭信山中有許奇

又戲題廣嚴僧房壁

幾年門外策征驂不料能來共一龕壁上未須書歲月
褚河南是護伽藍鮮于樞頓首

伯機子書法用功極深至每數日相見輒云近見子某
帖孰離孰合言語心相磨切率以為常伯機仙去十載
非特書法如伯機者不可得而朋友箴規之道亦使人
慨然此詩乃元貞己未游高亭廣嚴寺所作用筆道勁
與詩律精嚴是或一道卷中所及巖翁井西無逸亦相
繼云亡交游凋謝雅道寥落益增隕涕至大辛亥十二

月望日巴西鄧文原書於素履齋

書法不講百餘年至元間伯機子昂二妙特起古意復見於今予嘗謂後有尚論國家文藝之盛必來取斯伯機歿既久時人購藏殆欲家有其書而其合作未有如此卷者亦有錢唐佳山水當時神情朗潤以至此昔人云不恨臣無二王法恨二王無臣法非耶詩逼王半山叙事類崔德符手評豈妄盍就子昂學士正之延祐五年四月二日高郵龔璠書

虞邵菴書誅蚊賦

平江水鄉蚊蚋全集予方窮居日以為苦因裛腹筭得蚊事廿有七古聖賢無一言之褒是為可誅也作

誅蚊賦其詞曰

惟朱明之肇序兮迨白藏之紀時火流金而方熾露漱

玉而易晞眷曦和之自東起咸池

日所出處

而徂西邁崦嵫

日所入山以頓轡歸矇汜

日所宿處也見選禠體詩

而匿暉旋羣陰

之綽綽襲夜氣之索索爰有黍民

古今註號蚊蚋為黍民

出于虛

霍呼朋引儔訝雷車之殷殷

聚蚊成雷見前書

填空蔽野疑雲

陣之漠漠

梅聖俞詩云

利嘴喻麥芒之纖狹翅過春冰之薄

其賦形而至眇其為害而甚博非泰山之能負

荀子重負山

詎九牛之可搏

漢書搏牛之蝨

較爾力以何施念爾欲而甚約

飲不過于滿腹性無饜而肆蠹若乃皓魄之亭亭萬木

之欣欣悼永晝之執熱徒綠蔭以怡情遽見侵而稍稍

復輕颺以營營

白鳥營營見下註

念炎燄之未去曾須臾而靡

寧伺人于燕息則東家之夢何緣而見姬旦黜人于尊

俎則鹿鳴之燕何由而娛嘉賓

宋子京有蚊蚋黷人之句

以是而肆

毒于人何名乎仁載引其類載鼓其翅但知進而忘退

不顧害而貪利葬仙鼠之腹而莫追莫悔投秋虫之罔

而自捐自棄

古今注以蝙蝠為仙鼠羅隱賦謂蜘蛛為秋虫

衝鬱攸而致燔望

銀缸而還墜以此而速禍于已孰名乎智仁既不足以

強名智又不足以自蔽徒肆情以饕饕競鼓吻而啞啞

宜先哲之永歎謂通夕而不寐

老子曰蚊蚋嚼膚則通夕不寐見莊子

慨

蠢蒙其何識亦炎涼而絕義故有蓀壁琰槐椒房璇題

疏寮豁其文綺繡覺煥其陸離圍絞綃以雲障焚椒蘭

而霧迷乃戢翼以遠邈縱含毒而莫施以貴嬪之被寵

而不潛不螫

南史孔貴妃傳

畏長遜之當路而莫近莫窺

南史孫長

遜本傳

其或柴扉僅居蓬室桑樞方親闈之定省政黷堂

之卷舒或漂流于羈旅或促迫于郊墟乃引利喙以競

進共逞貪心而自腴致晉室孝子獨嘗以身

晉書展勤云云

高郵貞女莫全其軀

高郵有露筋娘子廟

嗟乎蚊乎貴者要者

既屏息以遠止貧者賤者又窮欲而紛如顧余躬而何

較念爾虐其有餘其間別種稟性尤酷實尖其嘴實斑
其腹實細其身實豐其毒感變化于天工載惆悵于羽
族仙禽遠害必翔于九臯神鳥覽輝乃集于王谷傳信
之雁目斷而莫至報喜之鵲日聆而不足此固曠然而
難見爾乃頽然而難逐可憐爾之輕而翔不恥人之厭
且辱也蓋嘗究厥譜系考于典集實蚩尤之餘孽始涿
鹿之誅殛僅存膚血之遺餘致茲種類之蕃息

見幽冥錄或

別派于腐壤或聚族於幽濕惟可夜游鮮從門入驟致

身于雲臺而羽翼

羽翼 鵬冠子雲臺之高 適以羽翼

遂逞威于河

內而人馬籍籍

古今注河內有人嘗見黍米許大人馬滿地取火燒之皆化蚊蚋飛去

但

類非于華胄實盡銜于毒螫宜見憎于世俗夫豈間于

今昔惟小日之昏昏卧柏寢而悒悒念白鳥之阻饑塞

翠惻而聽人

見金樓子

曾醜類之莫去宜豎刃之僭逼此鑒

既明汝惡既極將不復汝容而搏之特吾一振手之力

爾固又將驅空中之蚊挫汝之精

空中有物其名為蚊聞蚊之聲則挫其

精 僂江東之鷓而不復孕汝之形

爾雅江東呼鷓為蚊母此鳥吐蚊因以名

舉所謂蚋者而族烹于秦鑊

秦為蚋

取所謂蚊者而纂觀

于楚廷

楚謂蚊

永滅蚩尤之裔庶使天下之為人臣者得

以安其君大慰勤猛之志又使天下之為人子者得以
寧其親不復使無用之物無窮之毒存于世此誅蚊賦
之所以名也

右先太師丞相雍國忠肅公所著也先公文集舊刊
蜀中成書未久焚于兵火曾叔祖寶慶府君將求而
刻之湖南亦未及如志而運革而內附後先參政廣

求之不能得眉州故人史公孝祥守興化聞黃伯固家有之邈不可得也集在京師屬閩教授謝中物色之來報云有軍官好書購得此欲藉手與集相見然終不能得之先參政至泐從親戚韓大則得誅蚊藁于侯頤軒道士處蓋大德庚子歲也故人閒上人亦蜀中同出東南之家以舊故自吳門訪集臨川山中問此物所在出而示之則三十六年矣而先參政亦棄諸孤十七年詩書之緒不絕如綫感慨今昔血涕

隨之偶得此卷錄送上人貴得存遺珠于既失尚故
物之可求也元統乙亥三月廿七日集謹識

宋之南其宰執唯虞雍公為最賢觀其誅蚊賦所謂使
天下之為人臣者得以安其君天下之為人子者得以
寧其親則知公之志誅惡鉏姦者欲以寧君親也其以
忠孝教天下後世者至矣伯生世其家學能於聖時致
身西清被寵眷也殊甚及閑寂中乃書先太師此賦以
贈人其志亦有所在乎閑上人再見伯生其為我諗之

和林魯威叔重父謹題

因讀誅蚊賦深憐愛國情三公登闕謀四海失昇平早
覺文章貴爭期德業成雲仍蒙世祿翰墨負時名丹丘
柯九思賦

黍民肆毒不勝誅屈宋文章太史書滄海遺珠留得在
白雲深處伴僧居洛生王敬方

父作更生佛兒為命世英西州睹威鳳南國剪長鯨不
厭朝廷小終扶日月明誅蚊賦重錄妙墨世從衡遂昌

鄭元祐

右邵菴虞公手書其先丞相誅蚊賦稿也賦藁初藏于道士侯頤軒家後為韓大則所得獻于公之先君子井齋先生後公至吳侯道士因龍興閑上人謁公于寓所一見具言賦藁公軒然而笑曰我已得之矣侯道士為之惘然蓋韓大則初假之于侯而即以歸于公家而侯初不知也元統乙亥閑上人謁公于西江遂書此以贈焉頤軒本洞庭仙壇觀道士其度師楊紫霞與侯亦蜀

人宋季來吳一時名士之寓吳者若中書劉公丞相吳公皆與之交游名重於時寶祐間自吳游天台中書公為之倡首作詩以餞其行而先少師平舟先生亦次韻焉先子與侯交游粗深每出以示之先子求至懇切而侯迄不與先子歿後三年侯亦相繼而逝其徒李碧山與椿相知因椿之請即以歸之至正甲午冬十月閒上人因持此卷訪椿於家而徵椿言椿惟侯之平日靳吝於兩家遺墨眎若永為其有既而卒各歸於其後人豈

故家文獻不絕如綫而天固假侯之靳吝以待我後人
耶所惜者公之先君子猶克親得賦藁而椿先子雖獲
一見平舟遺墨而終不能得之於生平也今公既即世
而閒上人已老椿恐事之或湮故為詳著於此云眉山
楊椿謹跋

觀雍公少年之作可以豫見報國之志觀邵菴詳書之
意可以深惟追遠之情忠孝藹然萃于一門嗚呼盛哉
閒上人同是蜀人故獨得之當刻石寺中以傳永久庶

不為他時夜壑舟也至正十有五年乙未三月後學蘇大年頓首再拜謹書

虞雍公誅蚊賦刻石疏

宋丞相雍國虞忠肅公嘗作誅蚊賦內傳後公之六世孫翰林侍講學士以文儒顯既告老還江右而白雲間上人與之有舊自吳訪之於臨川蓋雍公文集舊嘗刻于蜀而版道毀學士後雖貴而雍公集求之不得竟不復刊學士之文參政公大德庚子歲亦嘗至浙物色雍

公集竟不可得而僅于道士侯頤軒處得誅蚊賦藁然
竟藏于家上人以賦藁為請學士為發篋取讀上人曰
丞相真蹟不敢望得學士手書一通東還吳則幸矣學
士遂為草草騰錄而仍記顛末于賦後上人念學士詩
文好事者已悉為刊板若雍公之功業雖不繫于文字
有無而誅蚊賦僅存耳兼聞江右近經寇亂百不一存
于是上人欲以學士所書賦勒之金石庶永久弗墜而
上人老矣力弗逮迺以此賦歸于公之八世孫戡字勝

伯者俾刻之勝伯既績學克世其家以世故棘薪益貧
困固宜寶而藏諸而猶慮夫泯而不傳抑亦負上人之
意敢以是干諸好事君子見助焉則賦刻諸石無難者
矣敢請至正十七年秋八月遂昌山樵鄭元祐書

虞邵菴書擬峴臺記

尚書司門員外郎晉國裴君治撫之二年因城東隅作
臺以游而命之曰擬峴臺謂其山谿之形擬乎峴山也
數與其屬與州之寄客者游而間獨求記於予初州之

東其城因大丘其隍因大谿其隅因客土以出谿上其
外連山高陵野林荒虛遠近高下壯大閭廓怪奇可喜
之觀環撫之東南者可坐而見也然而雨隳潦毀蓋藏
棄委於榛藂萑草之間未有即而愛之者也君得之而
喜增甃與土易其破闕去榛與草發其亢爽繚以橫檻
覆以高甍因而為臺以脫埃氛絕煩囂出雲氣而臨風
雨然後谿之平沙漫流微風遠響與夫浪波洶湧破山
拔木之奔放至於高桅勁櫓沙禽水獸下上而浮沉者

皆出乎履舄之下山之蒼顏秀壁巔崖拔出挾光景而
薄星辰至于平岡長陸虎豹踞而龍蛇走與夫荒蹊聚
落樹陰晻曖游人行旅隱見而斷續者皆出乎衽席之
內若夫煙雲開斂日光出沒四時朝暮雨暘明晦變化
之不同則雖覽之不厭而雖有智者亦不能窮其狀也
或飲者淋漓歌者激烈或覲觀微步傍徨徙倚則得于
耳目與得之于心者雖所寓之樂有殊而亦各適其適
也撫非通道故貴人蓄賈之游不至多良田故水旱螟

滕之災少其民樂于耕桑以自足故牛馬之牧於山谷者不收五穀之積於郊野者不垣而晏然不知枹鼓之警發召之役也君既因其土俗而治以簡靜故得以休其暇日而寓其樂於此州此州之人士女樂其安且治而又得游觀之美亦將同其樂也故予為之記其成之年月日嘉祐二年之九月九日也南豐曾鞏記

君作新臺擬峴山羊公千載得追攀歌鍾殷地登臨處花木移春指顧間城似大隄來宛宛溪如青漢落潺潺

時平不比征吳日緩帶猶宜向此閒郡人王安石為裴
使君作

南豐先生以嘉祐二年九月九日作此記先生是年登
進士第而歸鄉之時也裴侯名材記不書名亦致敬邦
君之意後七十八年其從子紆守撫重刻之久之石又
亡又後二百年雍虞集書并附王文公詩一首

虞邵菴南豐曾氏新建文定公祠堂記

君子之欲行其道者時王之制有所不得為則推其法

意之所得為而為之此聖賢所以無不可行之時也昔者諸侯之國其昆弟子孫得以公族為大夫為士有田有祿以養之國有宗廟世守其祭祀百世之子孫祭于大宗五世之子孫祭于小宗而祖考之神靈蓋有所歸矣後世貴為公卿而無國邑惠澤無以徧及其族人於久遠君子原本而充類盡然傷其心焉是以有置義田以待後人之冠婚喪祭者矣宗廟不立祭享無所君子酌於賢賢尊尊之意而不得有所為焉於其賢者則緣

夫尸而祝之於社之義而致其敬則亦庶幾而已南豐
曾氏自魯國公有六子其顯者三人文定公子固最賢
子開之文如其兄而子宣最貴子固之學在孟氏既歿
千五百年之後求聖賢之遺言帝王之成法於六經之
中沛然而有餘淵然而莫測赫然而為時儒宗其文章
深追古作而君子猶以為特公之一事云爾魯公歿時
公弱冠未仕也家甚貧嫁孤妹九人必得其所奉母夫
人至孝老死不衰蓋其根于天性者純明得于經學者

深至所以行其道者衆人固不盡識也是以官爵不過於郡守俸入無踰于常僚猶悉其貲力置義田於臨川郡城之後湖與屬邑金谿之南原立為規約以惠利其族垂三百年矣此所謂能行其法意于可為者乎不然何其能久也今其族孫元翊以其父正子之遺命作公祠堂于後湖之上使其族之人食焉而思其本居焉而敬其身則公之遺意雖去之百世而烏有終窮者哉烏乎公之至元翊八世矣于廟則已遠於社則已疏即其

所遺田而祠之使羣情之渙者尚有所萃也不亦可乎
元統癸酉祠堂成適予自京師歸臨川來求文以為記
故為書此俾附諸義田規約之後而刻諸祠下云雍虞
集記

南豐先生記擬峴臺謂其山谿之形擬乎峴山也使他
人屬筆必更引羊叔子事而先生終篇但述風物游觀
之勝及夫裴使君簡靜之治而已蓋衆人之所必言乃
先生之所不必言也王文公詩則終始引叔子以致美

裴君蓋賦詠之作與紀實不同各一奇也邵菴虞公並取而書之厥有旨哉又嘗聞先生既為臺記裴君畀田若干畝即先生所置義田今在臨川後湖者此亦奇事虞公記先生祠叙義田而不及此必別有謂然書以附於臺記之後豈亦牽聯可見之意邪太樸親得此卷于公當有以知之范文正公置義田于蘇子孫遵守至今不廢嘗竊歎以為世之若此者一家耳今讀學士虞公所著南豐先生祠堂記知先生亦有義田在臨川金溪

世守規約與范氏同兩家盛德之長異哉夫以范公之忠義功名天下所倚賴而甫參大政以歿位不滿德焉曾氏三兄弟子宣為相子開翰林先生止西掖名位亦有差子開雖賢而魁然以儒學文章重者又莫先生若也嗟夫宋之賢人君子若范公之與先生者希矣其君之國有不能保而二家之田獨至今存且將傳之無窮則當時不究其施有不足恨而其子孫所以為憑藉扶持者又豈竭其勢力之所可能哉觀于此者可以有省

矣至正元年歲辛巳十月下旬東陽吳師道書于京師
居賢坊官舍

右奎章閣侍書學士虞公書曾文定公擬岷臺記及公
自作新建曾公祠堂記附以王文公臺詩以遺臨川危
素太樸甫積昔從公於京師自天厯以後公日在閣下
而又總裁史事非大制作多不及親書又苦目昏今觀
此弓道粹整密所罕見也至元三年正月十又六日門
人九江方積同豫章楊鎰觀于鄔子柴

明年夏五月廿又六日晚生清江俞立同廬陵文容敬
觀于金陵護龍河僧舍

金華黃潛觀

文定公初置義田令本房子孫不得食文昭公增置田
乃令食之太樸熟見其家規約云爾文定之不自私文
昭之均其施皆可書也吳師道又識

虞公篆法八分楷書暨文章皆萃美于茲卷而南豐先
生之文行又因以起百世敬慕于無窮焉非苟玩其詞

翰而已至元六年歲次庚辰夏四月十八日金華王餘慶識于吾友太樸危君京師迎陽坊之寓舍

至元六年歲在庚辰十月廿有一日沛南張引同豫章楊鑄敬觀于京師寓舍之湛然齋

曾文定公擬峴臺記王文公詩奎章閣學士虞公所製文定祠記三者又皆虞公手書之虞公蜀人今家臨川文學與曾王兩公相望而此卷實具有之烏乎美矣太樸宜與曾氏子孫求貞石使吳中石工并刻之臨川有

榮觀焉晉安陳旅

前賢不苟作落筆便可傳世今觀元虞文靖公所書曾
文定公擬峴臺記附以王文公詩而跋之又書所作文
定祠堂記于後一記一詩議論根據鏗然金石聲文章
家取為楷式者是豈苟云乎哉元統癸酉適公病目歸
田之後年六十有一矣而篆隸書皆端整若此非其平
日運意精密筆路純熟惡能爾邪卷尾有元儒吳師道
諸名人跋皆當公存日為危太樸先生題者蠅頭細書

無一筆苟師道凡三跋尤精確有深意真可以繼公而無媿也公書此卷後十七年而捐館又後百三十有四年環觀於翰林修撰吳君原博所原博屬題因得留几格間臨玩數月乃敬識而歸之連城之壁不足多也成化壬寅中秋泰和羅璟于紫垣西之冰玉齋敬題

觀擬峴臺記跋語當是文靖為之重書而欲重刻于石道園學古錄文定祠堂記未有并書篆三字則此卷疑亦當時書石之副今南豐曾氏祠下石刻有無不可知

然陳衆仲跋云太樸宜與曾氏子孫求吳中石工并刻之豈當時固未嘗刻耶當訪之臨川之賢璟再題

右虞邵菴先生擬峴臺記四隸字南豐曾氏新建文定公祠堂記十二篆字楷書記文一通詩跋各一首書家者流所謂人品高師法古者殆兼有之此危太樸家物傳至庶子吳君原博蓋百四十年于今矣祠堂記及跋皆先生所著臺記出文定者皆世所傳誦而王荊公詩筆亦與此時作者不同然則此卷雖謂之三絕可也原

博博古能文且邃書法其以予言為將無同乎卷尾有黃晉卿題名宋景濂陳衆仲吳師道跋語又出三絕之外詩所謂尚有典刑者竊有慨焉姑識其紙隙以俟後來君子弘治元年戊申日南至長沙李東陽書

南豐先生曾公文章在宋稱四大家今觀虞邵菴作公祠記稱公孝友至有義田之舉而作郡之政又往往載諸史冊有不可誣者則公之所謂文章其亦異乎後世之文章矣昔人有謂公行義不如政事政事不如文章

其信然哉此卷今吳庶子原博先生所藏蓋危太樸家
物也噫太樸不能不有愧于二公顧以歸之原博其亦
有由然哉弘治己酉秋九月朔台人謝鐸題

虞邵菴書豆腐三德贊

虞先生以老病謁告還臨川山中故人父老賓客鄰曲
及族人昆弟子孫咸喜喜其歸也雞豚之饋狎至不敢
不為之盡歡而齒豁目昏又性不喜殺生食飲之際未
皆如其意山中人有所齏豆腐以進者欣然樂之蓋盤飧

至前目昏不能有所選擇隨七挾所獲精粗骨肉不能辨也而豆腐盈豆如一隨取皆佳一德也齒豁每食肉輒填齒隙非極漱剔不能去間濡乾皆費咀嚼可取飽無是苦二德也柔潔澹潤無殺生之惡三德也吾鄉仁壽在萬山中地高不宜稻而宜豆鄉中人食豆蓋多于粟成都人皆斬吾邑為食豆人而鄉語謂豆腐為菜云懷故鄉風物之美緣老年食物之便作豆腐三德贊贊曰掇山腴治仙漿軟于雲潔于霜舌生肥齒不傷君

子食之壽而康肘後服玉舊有方傳之天下匪私吾鄉
元統元年十月十九日橫舟中書

虞邵菴詩帖

九月二日移柴門向水辱玄卿外史鍊師賦詩
相屬及於老易之要佩服雅意忻懌亡已輒次
韻一首為謝仙凡之語頓不類矣皇恐皇恐集
再拜

老寄池邊舍新移竹下門高人知獨樂妙語枉相存衣

食隨年歲文章付子孫惟求園綺輩白髮共清尊

喜陳克紹自蜀中持舍姪書至用韻就呈上


有客持鄉信殷勤遠及門枯桑同我老慈竹賴誰存萬里迷歸夢蒼茫念老孫偏呼小兒子一一話親尊

先丞相暨秦國夫人墓上枯桑駐烏羣以孝感所致雍公有辨烏賦荅公所示詩也近年來更生大悲閣先公祠前生竹一本中間兩枝合而後分鄉人以為集當歸之祥鄉中及朝士皆有

詩也是日榻中書

黃金鑄為鴨焚蘭夕殿中窈窕轉斜月逶迤動微風綺
席列珠樹華燈連玉虹無眠待顧問不知清漏終邵菴
奉寄白雲閒公講師鄉契尊宿虞集上

古寺白雲門鐘聲竹樹間唐詩留屋壁蜀道憶鄉關橘
柚霜前送袈裟雨裏還至今三十載刻石玉遮山至正
乙酉十月六日榻中書



趙氏鐵網珊瑚卷五

欽定四庫全書

予部

趙氏鐵網珊瑚卷六

詳校官中書臣孫溶

編修臣程嘉謨覆勘

總校官進士臣朱鈐

校對官學正臣周鉉

謄錄監生臣洪策

欽定四庫全書

趙氏鐵網珊瑚卷六

明

趙琦美 編

虞邵菴酬荅翼之篇翰

集頓首翼之賢良學士閣下昔在朝著不能奉揚文翰之美歸來山中徒增悵惘從白雲寄示詩卷益見高情輒綴鄙句卷尾而截留其前留之篋笥永以為玩也為劉彥明作得墓表數句敢煩大手代作楷書并篆額一

是不知彼中得石大小一是集久苦目障作字甚艱不
復能多字也非恃愛厚不敢爾唯翼之千萬恕察聞令
嗣為學甚好恨久不相見秋間當得會晤傾倒不宣契
生虞集頓首再拜 吳郡名家盛有唐流傳風致到錢
郎閉門三月梨花雨編寫千林柿葉霜客看舊題驚歲
月僧將新句度江鄉莫愁茅舍淹遲久秋菊春蘭各自
芳右答翼之秘校枉教之意以奉千里外一笑虞集頓
首

錢子工書越宋唐詩筒千里寄支郎揮毫曾見座霏屑
待漏尚憐靴滿霜商嶺歌殘紫芝曲鈞天夢遠白雲鄉
不迷故舊相思意酬唱同留百世芳僕過吳中翼之庚
兄出示虞先生所答詩卷輒亦次韻以寓羨慕之意時
至元戊寅六月十又三日金華胡助

聖代崇文邁漢唐相如詞賦早為郎天門侍燕常終日
江閣懸車已十霜展卷得詩驚健筆感時懷舊憶它鄉
先生絕學追千古一樹寒梅壓衆芳文昔以筆札從侍

書公著書閣下公去國今十年矣去年夏謁公于臨川之里第今年秋將如懷孟過姑蘇錢先生出公手札并詩示文伏讀悵然先生俾題不敢固辭至正元年九月十又七日新安程文謹識

翼之得邵菴所寄篇翰裒池成卷攜以示余余因有感于其愧悔之言亦次增諸卷軸柳貫上

漢庭有道起馮唐亦許明光對夕郎正為青雲疑素髮故教白兔擣玄霜客來笑我臨書札禮達如將講射鄉

閣老無時收衆望，褐夫有日譖羣芳。

筆翰風流說晉唐，敢將拙惡比諸郎。健毫日費徒成塚，
禿髻年侵不待霜。才士宜從鵷鷺序，畸人合住水雲鄉。
豈期天藻庭中老，遠寄詞章勝采芳。良右嘗奉和虞

公所荅詩，為謝適中州盧彥紀侍宮臨川遂書以煩往。
達後古愚編修見謂宜以附卷末。是年六月望日錢良
右

袁靜春雜詩

寓錢唐雜詩求教袁易頓首

舟行漫興

涉世恒多故，謀身轉益迂。
馬周聊逆旅，阮籍豈窮途。
鷺宿依船尾，楓凋落酒壺。
遠行慄慄意，對此不能無。

白露籠舟楫，青天失畫圖。
往來迷咫尺，收斂忽斯須。
野曠連飛鷲，江清映浴鳬。
還將明媚色，且復慰征途。

隄柳欹招纜，江花笑入舟。
高歌鳬鵠起，潤視水雲流。
牢落江淹恨，飄零庾信愁。
都將付尊酒，短髮得禁秋。

憂患看飄瓦浮沉任轉蓬
題詩霜葉赤對酒燭花紅
嵇阮情何曠陶韋意未窮
前賢負高興不必萬人同

重午客中雨

往恨湘纍遠他鄉楚俗同
流傳存弔祭汨沒見英雄
竹葉於人綠榴花此日紅
未須嗟旅泊吾道豈終窮

湖上冥冥雨和愁細似塵
翠嵐沾玉塵清潤逼綸巾
他日看濃抹茲晨傲涉塵
遂諳山水意有為若留人
令節殊方客虛樓暮雨時
何心吟鑄鏡予髮欲成絲
昌

歎誰浮玉芳醪且滿卮今朝羈旅思更用獨醒為

懷吳中諸友六首

風雨蕭齋裏雞鳴夜向晨簡編心力盡燈火髣毛新餘
地知游刃何人解斲輪煩君毋割席漂轉暫埃塵 錢
德鈞

並馬春風陌高歌夜雨牀追游前夢失漂泊此身忙綠
酒西湖色冰肌六月涼難招髯似戟來對玉成行 蕭
子中

卓行拘常調微官更數移君懷同棄屣吾道歎如絲
落材高世飛騰命與時晚成梁棟器剝破十年遲
湯

師言

枉策招尋密高談謔浪俱他鄉懷楚奏何日攬桓須
白月垂紋練青天落酒壺看君話心事餘子盡崎嶇
唐

希賢

共話巴山雨曾題華步秋儒官雖寂寞公子足風流
即擬同吳詠焉知效楚囚江南新作賦寄爾恐添愁
趙

明仲

之子華簪裔簞瓢只宴如為官應駐輦延客愧無車
早托襟期合能容禮法疎一鐙何日共料理讀殘書
馮

景說

右十三詩命意閒遠下語清麗可謂不流於俗矣然少
加精密杜少陵黃山谷不難到也因學民漁陽鮮于樞
題其後而還之大德辛丑冬至前一日也

伯機見通甫詩以古人自期自是當家語或者疑非伯

機筆殆未得其賞雋乘快之趣耳其品評字字的確非
伯機不及此仲長寶之泰定三年重九後三日高郵龔
璠書于甫里書院之西序

通甫客杭賦雜詩十三首困學翁喜其閒遠清麗而以
杜少陵期之識者謂為的確之論噫非伯牙不能精其
技非子期不能審其音九原不可復作徒發覽者一慨
云吳郡千文傳書

高人詩絕妙留與後人誇江海思親友風塵老歲華欲

乘山谷興遠訪杜陵家知己真成夢歌殘重歎嗟陵陽
貢奎奉題

予嘗聞外舅存悔翁論袁先生詩可近半山而困學於
此十三章期以少陵山谷然山谷律法雖嚴未免削刻
不能無詭遇之意視少陵濶步隨心未嘗不範我馳驅
者前輩評之矣況閒遠清麗不知可盡山谷否耶困學
必有所見也且此所雜賦皆五字詩律呂和諧使氣有
所充豈不可造少陵之藩耶更閱全集則存悔當中的

矣姑撫此以問于仲長天歷三年春正月京口陳方謹
題

全集慶昕公鄉客南屏覃思文字間視闕教寂音不啻
方駕過也故論議詩與文斤斤少許可獨盛稱吳人袁
靜春先生所作詩至謂清麗秀潤數十年所無有元祐
固已驚掉而昕出先生詩讀之恨不多見而昕言已足
信及來吳中先生子泰仲長與元祐相友善且已集錄
先生詩為若干卷刊行元祐得盡讀先生詩而昕之言

益信此卷先生手澤仲長寶藏者鮮于君首題直以杜拾遺黃太史並言黃從杜出其間不可分寸亂鮮于大手筆而其言如此蓋自有所見今昕公為天子祠官言論重當世元祐間卷賤士不足知先生故托昕推重先生之意於卷後而歸之仲長云至順二年龍集辛未夏四月己酉遂昌鄭元祐拜手謹題

予不識通甫而亦不多見其詩所見者止是十三首而已然即是十三首而閒雅清專之趣已見言間雖尚論

其人可也獨詩乎哉東陽柳貫題

予生晚不識困學翁而雅善其子必明每見其論先友之能詩者吳下袁先生必在其間及客吳先生已矣獲交其子仲長出先生所為詩一卷手澤尚新有困學翁跋語予於是益知必明之言信而有徵詩曰雖無老成人尚有典刑是卷近之矣四明姚安道謹書

先生落拓不羈放情物表肆筆成章皆直寫其胸中之奇春江靜波秋山峻峰不足為喻也吾儕碌碌從俗浮

湛與先生相去遠甚而欲強加評品正如盲人說象知其鼻謂象如杵知其牙謂象如蘆菰根一語不契便成聚訟豈不發先生泉下一哂也哉元統二年七月二十八日黃潛書

詩曰高山仰止景行行止每恨生晚不獲親承前輩先生論議幸於文字間時得接對文采風流之懿今觀吾鄉袁先生手書詩什洎鮮于困學至黃文獻公諸搢紳大夫士題識如拂蒙霧而覩景星之昭粲心目俱開矣

伏讀再四謹書於後洪武戊寅夏五月五日諸生王燧
拜題

吾郡通甫袁先生元大德五年辛丑自石洞書院謝事
游杭因書五言唐律十三首奉漁陽鮮于公伯機伯機
時為浙東帥府都曹吟詩作字奇態橫出一時南士多
慕與之游故通甫亦以詩求正越明年壬寅伯機北還
得官太常典簿以歿又四年丙午通甫亦捐世矣迨後
二十五載通甫之子仲長出示浙江儒學提舉龔璠子

敬禮部尚書致仕干文傳壽道集賢學士貢文靖公奎
仲章江浙儒學提舉鄭元祐明德翰林待制柳貫道傳
侍講學士黃文獻公潛晉卿暨子敬之壻陳方子貞四
明姚安道師德各有題識入國朝洪武中吾郡贈太子
賓客王文靖公燧汝玉復書於卷後以致景仰之意今
年正統戊午通甫五世孫刑部檢校以凝復求予題鳴
呼吾郡素稱士大夫淵藪世變相仍故家子孫能嗣守
先業者鮮矣通甫手書諸詩在元大德間距今一百四

十年矣是非子孫之賢其能保藏而不失墜也哉雖然
猶有進者詩曰孝思維則通甫之學之德困學以杜拾
遺期之龔子敬叙其詩謂得性情之正牆東謂其嗜慾
之機淺是皆後人所當勉焉者也敢以是復諸檢校其
鑒茲哉嘉議大夫都察院左副都御史海虞吳訥敏德
識

寬少喜考論吳中前輩嘗閱元黃文獻公文集載袁靜
春先生墓誌知其為吳人而尤以不得見其子孫為恨

他日社學師表以昭氏過予談及其家世則靜春乃其
五世祖也又明日挾靜春所寄鮮于太常游錢唐雜詩
來示於是靜春之子孫既得見之又得見其手跡而詩
有懷吳中錢德鈞以下諸友之作又因得見前輩數人
於一日間為欣幸久之吳寬

吾子行小篆杜詩諸帖

碧山學士焚銀魚白馬却走身巖居古人已用三冬足
年少今開萬卷餘晴雲滿戶團傾蓋秋水浮階溜決渠

富貴必從勤苦得男兒須讀五車書

吳人錢翼之與僕交游數載每欲得篆字而不言僕
謂好事若此豈可無片紙為相贈意今日雨作賓朋
不來因染筆寫杜詩一首字不甚好然其意則頗有
拙處姑且充數俟他日心字清泰別作一紙未害也
大德庚子正月廿有六日趙郡吾衍書

招雨師文

大德三年夏六月天旱不雨民以為憂且祠禱多不應

文士吾衍呼雨師而告之為之文而焚之曰穹宇之分
奠兮以溷以清噓以為煬兮吹之以冷爰施降之序兮
下上以寧旁礴之有所或冷兮皇覽告余以不成惟茲
夏之亢盛兮草木暎以早零曷有滄之不沛兮火騰轡
兮較兢望凱風之靡至兮嘒萍翳兮弗興魃倡披以馳
驚兮吾有哀夫民之懲龜大荒之亘眵兮熾后土之陰
精恐暵死之駢道兮蔓天造之忠貞芻靈鱗兮齊以盛
神之俸兮雷為霆歟帝阬兮復俸下庶九有兮民惟正

圉赤魃兮山以圍風爾駕兮雲爾旗玄澤下兮萬福釐
陳吾辭兮具鑑茲

桃花雨樂府一章寄翼之

秦源春夢陽臺晚風散驚紅作秋苑閒陰碧樹搖暖雲
茸苔羅水香氤氲蝶飛不濕煙錦路吳娥怨澁鸞塔步
參差海羽雙燕來依微右舞瀟湘回

古詩一首送翼之回吳

游子動歸思江南起秋聲我亦當此時相送難為情交

朋尚如斯況爾懷父兄三吳亦鄰邦一水非遠程君還
姑蘇臺我留鳳凰城兩地各相望馳心互奔傾流光若
頽波彼此即寓萍浮世苦離散輾轉百慮縈何能慰余
懷握手徒營營

次韻謝錢翼之

筆翰西臺妙文章五鳳樓美才須比玉直道豈如鉤吳
苑辭春色江風散旅愁吾廬正蕭颯二仲得羊求

茵耳徧沃野

菌耳徧沃野瓊芝亦芬芳羣陰掩其茨誰復知爾良我
願得此草移根植崇岡間攀紫金蕤挹露晞朝陽服食
換綠髓輕舉過紫皇招攜三辰游與之同輝光

與鄰寓人隔屋對月夜話

禦寇連牆屋神交得謝瞻

謝有隔屋
夜話事

偶逢吾所契共語

月當簷微祿終何補良才尚此淹憑君縱玄論未怪發
幽潛

右故人吾子行手跡十二紙皆前後得之於書夾所藏

復恐散落集而存之其為人見石塘胡先生所為墓銘
茲不書後三十年為至元五年己卯九月九日江邨民
錢良右識

吾子行文塚銘

附錄

金華胡長孺撰

吾衍字子行太末人大父為太學生留弗歸遂家錢唐
子行工篆隸書通聲音律呂之學讀太玄經號貞白處
士慕李長吉詩樂府效其體為之氣韻輒與相似性曠
放有高不仕之節自比張志和郭忠恕玩褻一世遇人

巧宦善富如蟲蛆臭腐將啞染已其所厭棄者詣門請
謁從樓上遙與語吾出有間矣顧彈琴吹洞簫撫弄如
意不輟求室委室教小學常數十人未成童坐之樓下
與客對談笑喧樓上下羣童一是肅安好譏刺輕侮詩
人文學士獨盛稱杭仇仁近娶胡牧仲汲仲至謂百年
止有其著述有尚書要畧晉文春秋楚史檮杌說文續
釋道書援神契卦間氣中編等書初子行年四十未娶
所知宛丘趙天錫為買酒家孤女為妾女嘗妻人年饑

棄歸母與後夫匿弗言輒去之太末妻為子行產子數
日死留五年當至大四年秋故夫微知妻處訟之逮母
母來子行所又逮後夫後夫復舍於子行因偽楮幣事
覺捕得言主人子行固弗知邏卒辱子行南行數百步
錄事張景亮識子行叱邏曰是不知情者攝之何為即
解縱遣歸臘月未盡二日甲午子行持詩一章暨玄緇
緇笠以詣仁近別值晨出家留詩還緇笠子行去不知
所之其詩曰西泠西畔斷橋邊意將從靈均於斯明年

三月辛酉衛天隱以六壬筮之得亥子丑順流象曰歲
子月巳旬寅斯首亥為水鄉巳墓在丑惟子與丑無祿
實虛墓非其藏屍沉江湖是生戌辰土為宰制土弗勝
水家絕身棄此其骨朽淵泥九十日矣與詩合西湖多
寶院主僧可權從子行學詩聞其定死哭甚哀為琬良
石鐫碣院後與浮屠師遺塔相望曰皆吾師請長孺銘
庶幾子行有後世名其銘曰生不瀆死不辱貞哉白
余自至元元貞間客杭得交子行父雖齒在余先甚款

密也予往來于杭有年間歸吳門每承以詩或書尺見
寄今猶有存者其過山村翁訣別之詩按胡汲仲先生
塚銘廼至大四年也越三十一年為至正改元始見其
手跡於廬山甫家感悼之餘為作七言一首以附於後
亦挽之之意云時余六十又四良右

無家人擬地行仙自號青霞小洞天愛竹每留緣郭寺
吹簫時泛過湖船詩魂渺渺波搖月篆脚垂垂雨在川
老我猶能見遺墨可堪回首斷橋邊

李士弘臨右軍帖

員嶠真逸 擬晉山房 河東李侗士弘章至大己酉
七月晦日書於延平員嶠真逸

李公無帖不臨可謂好學也已僕亦好書者無暇臨古
帖但美士弘耳子昂

擬晉齋臨帖用筆圓活精到其勤篤可為世法余每見
愧悚不已自恨昏惰無此功夫耳黃石翁

臨古人書多苦局促鮮能得其韻趣余素聞李公善書

今觀此帖誠得逸少筆意無愧前人也

闕袞

士弘天資高邁風神秀朗宜其筆墨超然蜀郡虞集

右集賢侍讀學士李公士弘手臨晉王右軍明府等帖真跡一卷士弘名個河東太原人好學尚氣劬神苦思務求博洽而後已故其游戲筆墨皆超悟不羣此卷雖臨倣古人而清新婉麗自有一種風度是可珍也泰定四年七月壬辰吳郡陸友仁書

今人臨帖自松雪翁後便到員嶠真逸謂皆有晉人風

裁此卷又薛道祖與米老書者寶晉之流世豈無斯人
仙游去已矣興懷感悼錢良右敬題

余幼時每見士弘公與先君議論談笑使人敬服不已
其文章政事為當世之所推重人但知公之能書而不
知公之為人者有不在於此東昌高晉

繫游藝擬晉氏河東李后十年筆墨仙茲其傳弋陽李
瓚

員嶠作畫息齋伯仲間其臨摹又頡頏於松雪困學二

老斯時有三君子而能追及之可謂難矣員嶠至今存
雖獨步可也翰墨特其餘事至於立身宦途而志趣常
超於物表此吾所以起敬者也至順辛未仲春望日後
學黃公望

龍跳虎卧世眩淑忒繫其古心員嶠真逸李升

論書至於孫過庭姜白石盡善盡美矣他皆未足為評
也姜謂臨書多得其筆意而失其位置今再觀員嶠所
臨兼無位置之失非其胸中熟於二家之論恐未易致

也良右題

公在延平日政事之餘留意翰墨間故臨帖為最多此卷又其精妙者亦何憾於古人耶吳興趙雍題

余昔侍李學士見其作書多喜矮桌執筆甚高臨帖亦然其精熟如此非拘拘摹倣者比宜其遺墨若斯之妙也鄱陽張昕子東

錢翼之書四體千文

余壻張性之久言作四體千文未暇也連日不及無以

遣興遂為引墨雖妙不及古人或後予生者庶亦知字之源委也至元二年三月下旬蘇人錢良右翼之記

吳郡翼之錢君書法為明時名重四方者也此卷千文備四體之精妙性之張君攜至東陽因得以觀至元丁丑二月望日浮光王都中敬題

此卷錢君翼之作以遺其壻張性之篆隸真草古之善書者亦各有所長而鮮能兼之也性之究農黃之經餘暇喜臨池清標雅尚蓋貌如其心錢君書四體千文而

受之法粲然可玩性之當亦開悟矣新安汪澤民書

右四體千文一卷吳中錢翼之先生書也古精於書者
莫如晉之王庾謝皆稱書聖篆隸真草猶鮮能兼況其
下者乎翼之道學而善書備四體且精到書此以遺其
佳壻張性之蓋望於性之者其有深意乎性之儒而醫
好古博學者也暇則臨池日不下千餘字雖造次顛沛
一點一畫不苟駸駸逼翼之而窺古人之域自是不止
其當何如哉由筆法得三昧持敬以養其心言動舉措

無不求其至而一如用筆然此又何止於論書也古所謂心正則筆正其不謂茲乎至元丁丑二月集賢同書吳人之以書名世者始張旭張從申至於今風徽未泯也翼之以字學有聞於其鄉餘三十年此卷為其快壻作四體千文是尤得意之書即今已不可易而致之況其後哉東陽柳貫

評者謂吳中惟松雪翁書法備衆體繼之者錢君翼之因觀為其壻張性之作篆隸正草四千餘字老筆至此

亦甚勤矣外訓之傳將見青出于藍也勉旃勉旃海岱
劉貞白記

吳興趙公早年學書用功至精密迨其得於心應於手
縱橫曲折無不如意之所欲出以公之學名其家者務
於速成往往摹倣公暮年所書而求其形似如不由其
戶而欲升其堂入其室也得公之用功精密又參以古
人而別出新意自為一家如吾翼之者蓋不多見此卷
千文四體皆其得意書尤不可易得今翼之已不可作

而有子遠能傳其業亦以余言為然否乎至正六年六月十五日黃潛書

予觀中吳錢君翼之書四體千文其用功可謂精至矣四體之字出有先後當時學各工一體今以一人而欲兼之難矣哉夫篆籀實字之原隸真草其流派也體雖不同凡下筆當務方園雄勁則風神完足而結締之工拙不足計也臨池積久必自有得翼之其有見於此與惜其墓木已拱而不得握手劇談也此卷乃其女夫張

性之提舉家藏尤其著意所書性之以通儒精蘆扁之
學佳士也能知寶此其東牀之選不苟矣至正十八年
臘日鄱陽周伯琦書

張外史書雜詩

答楊廉夫二首

弄水摘花春可憐風雨捲尋茅步船我家南塢有靈石
龍井西頭無杜鵑野鶴孕鷄畏人過弱柳委地趨蠶眠
子雲胡為甘寂寞後世何人知太玄

黃蔑樓中惟飲酒樓下長溝鳬鴈多灣頭橋斷迷青草
濶處風來生白波饒奴竟煮脫裯筍老魚戲啞如錢荷
詔書寬大到海角河北饑氓爭倒戈

書摘阮圖

四言

長松結陰芳草如莽丘中微吟有天際想被阮者咸發
我撫掌一鳥不鳴衆山俱響

黃子久畫

中峰大面削鐵如巖岫綺錯非一途上連閣道旁屋廬

尋窗數戶愁崎嶇米顛所製三尺圖筆力視此微粗疎
閨苑之臺遲子久不歸正為松江鱸

趙子固墨寫水蕉

因依水石間小蕉露如洗聊以觀君身浮脆正如此平
原佳公子泚筆寫蘭茝

一作
蒹

君看數寸碧氣壓凡花卉

贈漁樵侶

郁木坑前負薪者道士磯頭垂釣翁我輩與結平生友
夫君還有古人風水羞涼味蒲牙白野飯晝香松菌紅

借問行藏多歲月不離三泖九山中

水仙

芳草有時歇無此金玉相一枝和月露持奉水仙王

奔月卮歌

甕社明珠奔入月脫殼正似風禪潔漁網出之不敢視
滌盡含沙光不滅文昌四星吞在腹一金晶大如菽
蜃物還來作飲器日夜雄虹繞茅屋一扇桃核寬有餘
半葉焦心卷未舒飲非其人躍入水怪雨盲風生坐隅

置之天上白玉盤斗柄挹酒長闌干李白跳下鯨魚背
持勸我飲相交歡幽宮馮夷為予泣酌盡海水百怪出
還我平生老蚌胎許君醉卧鮫人室

彭南陽真人雲窩煉丹之所

石枰碁子皆生路洞室藏書盡隱文誰與解醒千日酒
我來分住一窩雲虎龍金碧親承訣鸞鵠青冥動作羣
莫向鄒忻參火候定知此事屬彭君

送鄭明德過越

四十日春廿日雨問花尋柳意茫然竹根卧瓶高筆塚
竈下生薪連术煙茅家名餘鐵爐步龍井氣脅金沙泉
嵇山酒船速回棹遲子重來煮蕨拳

吳大宗師岳宮行香次韻

元日朝元回羽隊東華門外踏春陽還趨岱岳祠宮闕
遙識仙官劍佩香國有著龜金作鑑年登耆艾髮如霜
老人星在微垣內可是人間化日長

棹歌

暇日拿舟出郭門觀風聊采野人言借車踏水半陂麥
打鼓買魚何處村光陰轉比中年促生聚惟餘西澗繁
正使枋榆安尺鷃又從倦鳥返丘園

強行之常州教授

聞道詩書種南方有此強才名文學掾步武紫薇郎家
與臯比近槃餘苜蓿長諸生時列坐亦足奉華觴

道園先生詩送張元朴還龍虎有云塵尾有懷
張外史鷺羣今屬薛玄卿元朴索次韻

想見先生戴笠行黃茅岡上看陰晴承聞祖道同疏傳
鄙說還鄉似長卿海內好詩元自少江西行李不嫌輕
謫仙愛與元丹語煙子而今亦有名

雪圖絕句

貌得王維三尺圖姑山無此雪肌膚瓊臺玉樹參差是
只欠芭蕉一兩株

吳興公自序云公謹父齊人也余通守齊州罷
官來歸為公謹說齊之山川獨華不注最知名

見於左氏而其狀又峻峭特立有足奇者乃為
作此圖其東則鵲山也命之曰鵲華秋色云張
雨賦詩於左

弁陽老人公謹父周之子孫猶懷土南來寄食弁山陽
夢作齊東野人語濟南別駕平原君為貌家山入囊楮
鵲華秋色翠可餐耕稼陶漁在其下吳儂白頭不歸去
不如掩卷聽春雨

玄覽堂絕句二首

簾櫳低亞小梅枝
快雪時晴綠滿池
鈴索不搖鸚鵡睡
客來假寐亦多時

殷勤老去惜年華
白晝張燈綠幙遮
吹徧玉笙天上曲
空將列炬照林鴉

次韻段推官觀潮

雪濤捲入白螺杯
雲夢吞將滌瀨堆
陣馬直從天漢落
颶風先自海門來
青山一向開銀壁
黃纈中央立露臺
好在畫圖留壯觀
江頭白首不堪回

贈鈕怜大監

論卷聚書三十萬錦江江上數連艘
追還教授文翁學
重歎徵求使者勞
石室談經修俎豆
草堂迎詔樹旂旄
也知後世揚雄在
獻賦為郎媿爾曹
請以蜀文翁之石
室揚雄之墨池
杜甫之草堂皆列學宮
又為甫得謚曰
文貞以私財作三書院
徧行東南收書卅萬卷
及鑄禮器以歸
虞奎章記其事
邀予賦詩如上

長吟一首悼瓊林真人薛外史

玄卿難再得本自食霞人高懷獨超物洞鑒亦絕倫君
自江東我吳下早歲聯翩待金馬御榻賜書凡一束僊
苑偷桃動盈把紫虛元君之玉訣青城先生教我者感
君多道氣探懷為君寫學士承旨平原公許我與君楊
許同一時標名兩外史羽衣白茅立下風我還句曲餘
廿載君乘輜軒歷煙海歸錦橋西結草樓樓中襍被長
相待風煙山水共追尋福臨洞口話離心年深書字化
為碧白首蒼茫成古今聖井山崩數千尺君從羣龍去

無跡困頓鹽車篠嶺頭此日思君復何益 至正四年
之秋江東龍虎山左右諸峯洪水一時發漂屋廬數里
間大小龍以百數悉挈雲而去其蛟蜃不能去者死山
石下若腐木然吁亦異矣明年玄卿化去篠嶺在貴溪
縣中道玄卿關路建館其上以憩行者虞道園作記

道言

造物於我厚一切使我薄瓶中有儲粟持此卧雲壑弊
衣取苟完得味在藜藿花鳥予友于尊酒不獨酌牀頭

堆故書敗履置牀脚未嘗身沒溺何與世濁惡正如散
馬牛不識穿與絡異時老髑髏會有南面樂

汪復心遣姪彥維自歛求詩復心年八十餘矣
汪倫自愛桃花水張翰祇思蓴菜湖九十山翁莫相惱
題詩元沒得工夫

趙伯常運使留題澗阿即席次韻

莫笑坳堂水膠杯泉頭落木動成堆天寒正使蛟龍卧
日短何煩駟馬來杖策東坡靈石塢留題外史讀書臺

舉觴賓佐風流甚老子游山第一迴

三香圖

凌波仙子塵生襪空谷佳人玉鍊容不奈天寒風露早
日高猶傍錦熏籠

澗阿對雨二首

山雲油然作山雨來不緩既沾靈石塢遂灑寒栖館落
木遽如許衆草行復爛有酒不堪酌無花堪把玩與聞
季長笛寧從中散鍛代謝夫何如徒為白首歎

步歸靈澗幽泥染居士屨不知嵐雨深稍怯布衣薄拂
牀次羣帙掃徑堆脫籜清坐亦偶然吾非慕仙爵

危君太樸以史事南來搜書風雨宿南澗明日
追寄此詩

布衣走下雲林巔檢閱經書天子筵去家昔踰半萬里
別我今將十九年輜軒使者采圖籍龍門太史行山川
澗阿一宿慰風雨起視留墨心茫然

寄劉伯溫大監

臺閣如公最有稱
輶車驄馬數能乘
校書在昔專劉向
秘監於今復魏徵
汗簡削成金作匱
泰階平處玉為繩
信有山人唯寂寞
側身長倚白雲層

九日風雨清齋

中林授衣節寒氣早已集
牖戶洎表褐凡百缺治葺窮
居昧時序頗訝光景急
叢篁助幽翳漾瀨發空寂
水禽穿屋過巖樹排簷入
陶尊既塵漬墨突亦雨立
遐思把菊詠端處掬溜室
空言非藥餌殆不廢九日

道館雅集聽琴次楊彥常韻

幽蒿細竹滿牆彎
雨後危牆似斷山
一室了忘塵世隘
諸君能賞病夫閒
池巡野鶴魚苗綠
土蝕秋虫菜甲斑
我不鼓琴偏識趣
絕憐失勢重躋扳

讀戴集

帥初號剡源

剡源詩卷落吾手
便似移家太白峯
學道昔慚山世遠
知人今愧郭林宗
空山樂書有遺譜
白日天馬無留蹤
皆集
中語
太息斯人不可作
厭將兩耳聞寒蛩

老學齋書懷寄京師故人

手種羣松數尺圍
草深南澗客來稀
一經斷送垂垂老
萬事安排念念非
晨待樵蘇才蓐食
涼驚絡緯尚絺衣
蓬萊坊裏清宵月
也到山家白板扉

中庭古柏

庭中異柏前朝物
銅柯石幹兀青蒼
雲壑終憐老蛟卧
珠樹獨留威鳳翔
月上團陰移覆砌
雨餘古香飄近牀
支離疏老深根在
閱盡世人還久長

李遵道寫湖石

好石曾聞牛相國寫竹今唯李使君能消龍尾一螺墨
與染峨眉半朵雲瑶草種來秋著露昆刀藏去玉成文
堂上朝來有佳氣淮南獻壽獨殷勤

趙彥輔雪圖

清才絕似王摩詰愛向高堂寫雪山華蓋洞中如屋裏
赤闌干外是人間瓊樓祇許飛仙住珠樹應留織女扳
莫信寒泉傷玉趾最宜清暑聽潺湲

秋日晚興

暝色入林煙火微暮雨欲來如有期
野雀喧爭棟樹子
山人行把菊花枝山空始見水泉涸
寒至乃索衣裘遲
莫謾題詩將寄遠不多故舊在京師

冬日五言

雨雪衡門晏陰景薄山阿飛鳥各謀食
媿此養微疴餘
生轉晦昧芳歲亦蹉跎勿云幽疾久去疾將如何

雪作

夕寂微生聽寒頑稍使猜明珠交撒帳銀甲整銜枚厲
鬼鋒全挫東皇駕即回眼中紛物色白戰若為裁

晨興

聊與梅枝說歲窮真成古木共衰翁百年勲業何煩爾
一世雲山不負公寒夢漸消窗影上春容已在雨聲中
晨興陡覺詩神王未放韶華角長雄

詠萼綠梅花

山中古仙子無言春寂寥玉容淡朝雨翠氣濕微霄臨

風怯玩影弄雪妬攀條吟覓何郎句還憑舞袖招

澗北梅歲三月始花

陰澗殘梅枿臨流一向欹但存孤注在敢恨一生遲凍
雨如相煦春寒不受吹後時翻見獨宰物遂成私

白蓮峯宴坐齋

早從衡岳端居室晚愛蓮峯宴坐齋香篆來時雲入戶
鉢龍戲處水浮堦重重草座閒收足歷歷松風妙寫懷
亦欲遠游參半句無人為我繫麻鞋

南真館池上橘花

花攢嘉樹雪鬢髻遮斷孤山小
朶青報答風光先醉去
穠香吹過却全醒

仲穆蕙花

空谷幽芳絕代姝
紛披翠袖不勝扶
金瓶芍藥三千朶
合讓光風轉蕙圖

歲暮

忽忽歲云暮
徒興白首嗟
山留待伴雪
春禁隔年花
把

卷還遮眼分錫且膠牙自綠身嬾惰莫遣送窮車

歸自天柱山招朴菴僧

仙人住近餘杭姥得酒攜瓶上野航踏雪能來傾一盞
風流不減在餘杭

白雲半間

陶隱居別號外兵

白雲住處不曾扃割取西偏著外兵伸脚三條椽下卧
任君裘蓋洛陽城

次韻虞公賦鶴巢贈趙伯容

仙人有騏驎結巢松頂中上覆三素雲下立千仞峯笙
吟微度曲雪步稍留踪羽衣何頗然云是趙伯容左帶
明月璫右佩蒼精龍誰令青鳥使銜花以相從鑿戶繩
樞澁藏書玉檢重悵望浮丘伯人間倘再逢

野桃花

野桃無語最含愁若箇林間得放牛比似落英歸糞草
不如流水出香溝

殘梅

皎皎當窗萼綠華滿懷幽恨付而家春風春雨忽忽去
一點殘香啄暮鴉

萬竹亭

高懷思得去人羣馬馱沙頭竹似雲亭子當江偏窈窕
主人遮道故殷勤日中見斗青霄立月下吹簫碧洞聞
渭川自足封君擬未數零陵萬石君

次韻虞公和斷江和尚種松

松下微吟愜病悰支離潦倒似支公頂因巢鶴翻成結

心為依禪畢竟空陸子壇前春古淡葛洪井上雨青葱
茯苓乞與楊員外誰復緘詩過浙東

謝僧送柑

肚能繫束三條篋手亦親栽萬顆梨珍重黃柑三百顆
好山多在洞庭西

晚句

白足過橋三峽雪蒼頭吹笛滿林風狂花也有凌霄意
飛上松顛爛漫紅

外史自贊畫像

志逸心疲身清命濁逃同類而親猿狙毒厚味而美藜
藿學取益而不勝其損事知危而姑與之安一龍一蛇
不厭已之深眇惡衣惡食先憂人之饑寒忽然為人而
反常若此若何以祛有身之患 乙酉歲自春徂夏霖
雨之時多五月來堇一日見天處澗阿幽篁中未有裹
飯過子桑者閒弄筆研寫繆詩盈冊以自料理耳詩凡
五十五首子英遇之持去勿示不知我者雨告

右句曲外史與袁子英所寫詩凡五十五篇其首兩章
廼此老道人效余鐵雅者也如道言清齋澗阿諸詩皆
其道趣中流出者若奔月卮則又頑仙之橫出者吁道
人仙去已一紀矣鐵雅之友屬之何人開卷愴然不勝
山陽之感云至正二十有一年花朝日抱遺叟楊維禎
在清真之竹洲館書

至正壬寅秋八月十有八日海虞繆貞吳郡余大亨崑
山顧元臣同觀弟子蕭登拜題

東維顧安定之觀於映雪軒時年七十有四

不識華陽舊隱居高情還憶聽松餘百篇真錄修都徧
滿卷新詩手自書一去丹臺閒日月幾回飛珮在空虛
重來化鶴應無恙華表春風動里閭至正甲辰冬十二
月郡人陳世昌拜觀謹識

至正廿五年乙巳春三月豐城余詮觀

壬子正月五日過婁東十日耕學先生出以示僕乃知
貞居之與耕學交好之情若此也倪瓚覽

貞居先生清詩妙墨飄飄然自有一種仙氣信非塵俗
中人也此卷手書以遺予者屢經兵燹似若有神物護
持泉南陳君彥廉好古博雅與予同志故割愛以贈士
子夏六月望後三日汝陽袁華書

張貞居詞翰正如月底疎松雲中修竹信非煙火食人
所能為宜吾子英之寶藏也貞居自題云非知我者勿
示子英出以示予豈別久而弛其約束耶齊郡張紳觀
於孫氏映雪軒戊申子月

右澗阿雜詩墨跡五十五首廼張貞居詞翰最得意者
在當時亦自慎重不輕示人觀其小序可見雖然非子
英之知貞居不能久藏至今非彥廉之好古博雅亦不
能得子英之割贈所愛以交誼之篤而歸諸春草堂可
謂得其所矣子英亦知人哉深為陳袁二家左券珍之
可也廬陵張昱題於凝香閣中

予觀在昔右文之際文章翰墨蓋莫盛乎東南矣不惟
列侍從居館閣者皆彬彬文學之徒至於方外名流亦

或負其清才絕藝擅名一時之勝故釋氏之徒有笑隱
訢上人道家者流有貞居張外史皆以詩文篇翰照映
乎山林而與虞趙歐黃諸君子接交於後先迭響於中
外於是東南文物之盛殆前古所未聞今觀陳氏所藏
外史墨跡一卷能詩者或無此書能書者或無此詩外
史蓋兼之矣慨名筆之留傳念昔人之彫謝江空歲宴
不無有繼遺響者乎覽卷為之憮然吳郡謝徽識

右張貞居自書詩一帙溫陵陳君彥廉之所藏戊申歲

見於袁子英家今歸於君君別有貞居所書詩大小十餘幅可見物常聚於所好君作詩往往有物外意非獨愛貞居之書而已也壬子亥月張紳再題

貞居早學書于趙文敏後得茅山碑其體遂變故字畫清道有唐人風格詩則出于蘇黃而雜以已語其意欲自為家也唐宋以來浮屠氏之能詩與書者雖衆然亦不能兩美況道流之久乏人哉此其自書雜詩也古律行草各臻其妙宜子英之慎與而彥廉之喜得也高啓

識

右貞居詩翰清原陳氏得于袁子英甫盧熊記

歷代史臣不為釋老氏立傳或老氏有可書者則以置之方技傳中皇明修元史始別有釋老傳之目而老氏首丘處機釋氏首八思馬且各有數人焉張雨生東南以工書善詩為道流一時學士大夫若趙文敏虞文靖黃文獻諸公多與之游乃不得入傳或者疑之然處機八思馬之徒在其太祖世祖時大抵皆以功業顯故釋

老氏有傳蓋不徒以其法而然者則夫雨之可傳正不
在此予嘗執筆從史官得預是議今觀雨自書雜詩于
溫陵陳寶生家詞翰之妙如是自當與趙虞諸公詩集
並傳也洪武壬子秋八月嵇岳王彝識

貞居真人詩文字畫皆為本朝道品第一雖獲片楮隻
字猶為世人寶藏況兼所得若是之富且妙耶舒展累
日欣慨交心噫師友淪沒古道寂寥今之才士方高自
標致予方憂古之君子終陸沉耳吾知前人好修不以

為賢於流俗而遂已不患人之不知果里翁志不得遂
飲酒賦詩但自陶寫而已豈求傳哉倪瓚題士子初月

八日

貞居詩如月底疎松雲間修竹字畫則如遠塞驚鴻春
池科斗非特不染塵俗塵俗自不能染耳張紳

壬戌陽月紳再觀于崆峒外史之丹室于是與彥廉別
十載矣

洪武丙辰秋九月彥廉自鳳陽還十有九日夜宿春草

軒復出此卷同觀題者自鐵厓先生以下凡十五人存者惟八人耳撫卷不勝黯然汝陽袁華識

張貞居以詩名湖海而翰墨尤為人所重片縑尺楮往往見之蓋未有若此卷之富盛者也孫過庭云一時而書有乖有合心遽體留日炎風燥皆其乖也神怡務閒時和氣潤偶然欲書皆其合也今貞居自言自春徂夏陰雨至五月之久故閒弄筆硯以自料理則非心遽體留日炎風燥正所謂神怡務閒時和氣潤偶然欲書耳

宜其聯篇接簡不覺其多而濃纖間出清婉流麗有合于古人之度也其詩傳諸人口已有定論特語其書如此彥廉好古博雅必能加寶愛矣蘇人王行題

予觀張外史自書雜詩一帙詞翰之妙使人如快雪時晴行山陰道中幽景所奪應接不暇披覽竟日不能去手勾吳張適識

溫陵陳彥廉氏出家藏張貞居所書雜詩凡五十五首詞翰俱麗見之不忍去手予英表先生與張貞居友善

書此以贈又于卷末書曰勿示不知我者子英以彥廉博雅故出以與之亦于卷後題之曰彥廉與予同志故割愛而與之雖然張貞居非至交則不書袁先生非知己則不與彥廉既得每為珍玩非知者亦不出示吁人之出處亦當待知己而後動也洪武丁巳秋八月恒山范益獲觀謹識

予初學書即知有句曲外史為浙之擅名者雖急于采其規格而世甚鮮有及間獲觀數帖率皆真跡其于用

腕指用紙墨之妙誠超出于衆能而成家者也以其才
氣則並乎蘇米詞或有過之者故一時名重朝野得片
紙如寶珠璧豈偶然哉此帖予知名久深慕一見二三
年不詳其定在茲獲一覽方之平昔所見猶霄壤矣孰
不珍其所傳哉癸亥歲孟夏耆山無為謹書于朝天宮
之桂堂

張貞居生平慕米南宮之為人嘗為著中岳外史傳故
其論議襟度往往類之獨其詩句字畫清新流麗有晉

唐人風流不蹈南宮狂恠怒張之習豈非獨其學問使然亦由貞居寄跡方外不為聲利所累而又居東南形勝之邦獲見故都文懿復游林壑以養其真氣故其發于詞藻者如此今去貞居卅餘年耳使人望而企之若古僊人可勝歎哉友人陳彥廉氏得其翰墨二帙皆平生得意作也余家與貞居世契展味之餘益增感舊之思云潯陽張來儀識

張貞居詞翰俱清逸飄飄然如驂白鸞游霞鄉自非有

仙風道骨者不能到唐之羽流中杜光庭輩詎足專美
于前矣彥廉宜寶之洪武十九年倉龍丙寅吳僧道衍
觀于春草堂

予嘗愛張貞居此帖詞翰清拔風致高遠當其神清氣
和用筆遣意疾徐頓挫濃纖間出故雖連篇累幅不厭
其多玩之如飛鳶戾空明珠映月飄逸光粲快人心目
可謂絕類離倫特立道流之表自子英化去垂三十年
意惜此帖遂亦淪沒今復覽于放鶴軒中展玩終日不

能釋手信知至物終當有歸從道宜珍藏之東吳吳文
泰謹識

昔人云作書類人若顏書之剛勁虞書之美麗歐書之
清瘦人亦似之予謂非惟字類人作詩雖言志而剛勁
清麗亦似其人今觀張貞居字之隨體賦形殊不經意
詩之隨詠寫志若出自然覽之則清風可掬深類貞居
之為人昔人所云為信然貞居書此亦自得意故題以
勿示不知我者噫示之尚不輕得之者好古博雅也張

卷六
豈為陳彥廉蓄之謂得其所今陳從道蓄之可謂又得其所矣從道宜保諸浚儀張肯識

張貞居詩帖一

服用雜詠四首

十年著一冠一冠已三載緇塵無留跡色為玄雲靄長
纓安所施輕導猶足挽每彈出新沐泛丸映朝彩短髮
不容被初服詎可改右玄冠

衣褐賤者徒為仁則由已粗疏實寬博彼賤孰敢擬寒

溫屢開闔補紉亦云幾信有不變玉貞哉居白裏使與
狐貉立翻為弊袍恥右素褐

客從麻姑來遺我楮素衾肪膚皓難澤鉛骨滑易伸配
此木匡牀共保一色純雞鳴風雨夕雁度霜雪晨楮君
方眷眷因之乃凝神右楮衾

粵昔大知舜有作陶河濱先民尚其質後世挹其醇我
亦舜之徒對之稱素臣木槃仰承足秋水酌及脣守此
三代寶孰謂吾廬貧右陶尊

省郎中檢校陪集賢揭學士宴集約賦十韻得
清字

中湖禮鶴祠南嶺謁龍泓傳命舟車集探奇水陸并郎
官思出沐閣老念辭榮遂接丘園士益騰風雅聲席隨
堤草展觴對渚蓮傾游塵麾外避仙飈鷁首生雲物屬
虛曠天容殊穆清非關遺草莽翳此扃柴荆偶違數刻
歡尚蓄千載情幽疾甘自廢時哉修令名至正三年癸
未歲冬十二月十有三日為廬山甫寫舊詩夜寒酒困

老態如此覽者毋哂張雨

貞居詩帖二

桂花下約黃秘監飲

翡翠黃金屑檀藥秋桂枝涼風何日到庭樹已先知一

杯持問月更待賈淳

闕

課山奴竹林采筍鞭煮食

疑有鮮卑奴過此玉鞭拋擲向泥中長鑱為我入竹去
晚飯簞簋也不空

馴鷺

了然馴鷺雪霜明下瀨求魚自在行碧玉燈檠雙足瘦
白麻衣袂一身輕海鷗見事應何晚凡鳥題門也不情
輸我駕行舊儔侶舉頭寥廓總雲程

題雪景山香圖二幀

春雪無聲入畫堂東風渾似北風涼祗緣何遜題詩少
信是徐熙落墨強青鳥下迎羅襪步蒼髯來近玉臺粧
匡廬也入幽閨夢睡裏山花各自香

雪羽飛來雪意濃國香狼籍暝烟叢倩誰與剪吳淞水
愛爾能吟柳絮風翠袖佳人玉條脫平頭奴子錦薰籠
劍南畫手看前輩著粉施朱或未工適寫詩未滿紙洙
水孔肅夫過澗阿因以為贈僕老矣倦于筆硯肅夫毋
責備也張雨書以乙酉仲秋望後一日

結廬句曲號貞居石鼎千年句法如所有白雲難贈客
豈無清露可為書湖陰小閣題金菌月下高冠製玉葉
白首交情洙水上歸儒深恨早迴車吳寬題

貞居詩帖三

次韻韓伯清見寄之什凡五首

連雲溪水出具區連雲莊叟得自娛高齋松月足吟嘯
濁世詩酒忘榮枯我無丹砂煉金液君有田土成膏腴
儻能種秫遠相致與爾日醉壺公壺

卜居海上僅三年春日繁華思遠天練水澄清宜釀酒
溪魚鮮美不須錢欲將野艇尋幽賞多謝雲山作勝緣
寄語風流老韓子定須禊日過莊前

聞尋芝朮保餘年信是神仙別一天
避地有書能教子窮居無術學飛錢
桑麻繞舍田園計竹素堆牀翰墨緣
慚愧長沙每招隱時臨車馬到堦前

乘居甘寂寞豺虎動成羣地僻傷春草
江空憶暮雲友朋難得會書札近相聞
世事今如此愁來嬾學文久客黃岡地
新年白髮侵笑歌思執手憂患苦關心
市井皆吳語山林獨楚吟羨君漁浦上
高隱貴要金

次韻陸秀才春日幽坐

新塘雨餘流水新隔窗看花如美人晴絲冉冉墮復起
幽鳥嚶嚶啼更頻自憐華髮在海嶠誰肯野服隨山氓
故園荒穢久弗治且復飲酒從吾真

觀友人所藏古墨

雪堂手劑不可得色如點漆黯無光安得一丸歸我室
臨池剝寫十三行至正二十年十二月廿日紫芝生為
又玄煉師寫一過

趙氏鐵網珊瑚卷六